

MABULU YA MASA YA KUTOBUKA



Mfumu, mu ke kwikila; Mfumu, mu ke kwikila,
Nionso ke salama; Mfumu, mu ke kwikila.

² Beto bikala ya kutelema na mwa ntangu fioti mpe beto kulumusa bayintu ya beto. Mfumu Yesu, beto ke meka na mutindu ya beto ya kukikulumusa, na kutuba na Nge, na nzila ya mukunga yayi, ti beto ke kwikila. Mpe beto ke sambila, Mfumu, ti na ntangu yayi, Nge ke fula na kubuka Dimpa ya Luzingu samu na beto, kupesa beto yina beto ke na yawu nsatu, na nzila ya Ndinga ya Nge. Samu beto ke lomba yawu na Nkumbu ya Yesu. Amen.

³ Beno lenda vwanda. Ya kieleka mu ke ndima ti, kana beno lenda sala yawu, ata ti mu tuba kaka mpova yayi me lunga na nionso “amen,” ti masakumunu ya nene ya Nzambi ke vwanda na zulu ya bantu na kisika yayi.

⁴ Na suka yayi mu vwandaka mpe ke widikila mbote-mbote lukutakanu, mu me sepela na bimbangi, na nzonzolo ya mosi na mosi. Mpe kuwa bayina me kwisa mbala ya ntete, mpangi yayi ya Baptiste awa yina kwisaka lomba lemvo samu yandi vwandaka fioti na mabanza ya yimbi. Na yawu mu—mu ke sepela na kumona yandi na bumuntu ya mbote, muntu yina lunga vwanda na mingi ya bumuntu, to—to tata mosi ya mbote, na ntangu yandi lenda banza ti yandi me sala kifu mosi. Yandi me sungika yawu na munu ve, ya ke na munu ve yandi me sungika yawu, yawu ke na Nzambi. Na yawu mu—mu me sepela na yawu, beno me mona. Nzambi sakumuna mpangi ya beto ya bakala, mpe mpangi ya yandi ya evangeliste.

⁵ Oh, la la, kuvwanda Baptiste, beno zaba, munu mosi mpe vwandaka na dibuundu ya ba Baptiste. Mu vwandaka mosi ya kimvuka ya Eglise Baptiste Missionnaire. Na ntangu mu ke kwisa na kati ya bantu, mu zaba yinki mutindu beno ke waka. Mu ke waka mutindu mosi, kaka ya kifuluka na kima yina mu—mu me zabaka ve.

⁶ Mu ke bambuka nzingulu ya munu ya ntete na ntangu mu monaka pentecotiste mosi, ya vwandaka na Dowagiac, Michigan. . . Beno lemvokila munu, mu kwendaka loba mbisi na Dowagiac, mpe mu katukaka na Dowagiac, samu na kukwenda na Indiana. Mpe na yawu mu monaka ba affiche, ya “Yesu” bisika nionso na ba voiture mpe nionso yina, mpe mu waka balukutakanu kilumbu yina. Mpe kilumbu yina landaka bawu bokilaka munu na kisika ya malongi, samu na kutuba mwa bampova, mpe mu salaka yawu. Mpe mu. . . Bawu yufulaka munu wapi dibuundu yina mu kele, mpe mu tubaka na bawu ti mu vwandaka Baptiste.

7 Mpe na nkokila yina bawu vwandaka na mbuta-muntu mosi ya ndombe yina lendaka longa, mpe yandi lendaka vwanda na bamvula makumi nana, mpe yandi kwisaka na kisika ya malongi. Nkundi yayi ya mbuta, ba vwandaka twadisa yandi na kisika ya malongi. Yandi vwandaka, na kazaka mosi ya yinda ya balongi, ya col ya velours, mpe yandi vwandaka na mwa bansuki ya mpembe na lweka ya yintu. Mpe mu banzaka, “Bantu yayi nionso awa mpe ba théologien, bantu yayi ya nene, yinki ke sala ti bawu bika lukutakanu na muntu ya mutindu yayi? Mbote, mbuta-muntu yayi vwandaka na kiti mosi kuna, kisika mosi kuna.”

8 Kilumbu yina bawu longaka samu na yina Yesu salaka awa na zulu ya ntoto. Mpe, kasi yandi bakaka, yandi bakaka dilongi ya yandi, mu banza yawu vwandaka na Job: 7, 20, beto tuba, mu banza ve ti ya vwandaka Masonuku yina. Ata mutindu yina, beno tala yina tubamaka kuna, to mwa kitini ya yawu, “Wapi nge vwandaka na ntangu mu salaka yinza, na ntangu bambwetete ya suka vwandaka yimbila kintwadi, mpe bana ya Nzambi vwandaka boka na kiese?” Mpe yandi zonzilaka yina salamaka kuna na Zulu, kasi bawu zonzilaka yina salamaka na zulu ya ntoto.

9 Mpe kisika mosi kuna, na manima ya dilongi ya yandi ya bamuniti tanu, yandi, Mpeve ya Mfumu simbaka yandi, mpe yandi pamukaka na zulu mpe bulaka bikoso ya yandi kintwadi. Oh, la la, kisika vwandaka ya nene, mutindu kitini ya kisika yayi ya malongi; mpe yandi tambulaka kuna, mpe tubaka, “Mu ke na kisika ya nene awa ve samu na kulonga.”

10 Mbote, mu vwandaka na bamvula makumi zole na ntangu yina. Mu banzaka, “Kana—kana yina lunga sala mutindu yina na mbuta-muntu yina, yinki yawu ke sala na munu?” Beno me mona?

11 Samu na kundima ti nionso ke ya kusungama samu na bampangi ya beto me kwisa mbala ya ntete, na kiese nionso beto ke zodila bawu kwizulu ya mbote na kati ya kinkundi ya beto. Mu ke mona ti, mu banza bawu zabisaka munu na ntwala ti nganga-Nzambi mosi kele awa, mu banza; ya kieleka, mutindu mu ke ya dibuta ya Irlande, bampangi ya munu kele bantu ya Catholique. Mpe bayankaka vwandaka, ba Baptiste mpe bantu ya luswaswanu. Beno me yangama fioti, na mwa ntangu fioti. Mu banza ti ata mpangi bakala mosi ve me zonzila yawu, kasi mu vwandaka meka na kusiamisa yawu. Na ntangu Mpangi Shakarian. . . Na manima mutubi yayi ya mbote fulukaka na kiese, na kuzabaka ti Kwizulu ya Mfumu me kuma pene-pene, yandi—yandi tubaka na ndinga ya malu-malu, samu na beto. Mpe beto ke na mitendudi yina ke pesaka ntendulu. Na yina, Masonuku ke tuba ti, “Kana mutendudi kele ve, beto vwanda pima.” Kasi kana—kana bawu tuba na bandinga ya malu-malu mpe bawu tendula yawu, yina me kuma profesi. Na yawu

kuyangama vwandaka fioti na mutindu ti ya vwandaka na—na zole na mbala mosi. Ntangu yayi, ya vwandaka kuyangama mingi ve, beno me mona; samu, mosi ya bawu vwandaka pesa ntendulu, yina yankaka vwandaka pesa profesi. Beno me mona? Mpamba ve ti. . .

¹² Mu tubaka ti mu ke tendula yawu na bampangi ya munu, kana bawu bakula ve, samu mosi ya bawu vwandaka pesa mbote-mbote. . . Beno me bakula nsuka ya mosi na yankaka? Mpe mosi vwandaka ya kufuluka mingi, yandi mosi, ti Mpeve ya Nzambi vwandaka pesa profesi na nzila ya yandi; mpe ke tendula, yina yankaka vwandaka pesa ntendulu. Na mutindu ti ya vwandaka ya kusiyama, ti beno. . . beto kele ve. . . Na bantangu yankaka, na mabanza ya kimuntu. . . Kaka mutindu mpangi ya beto ya luzolo yina lombaka lemvo na suka yayi. Ya ke fioti ya kuyangama na muntu yina ke bakula ve. Kasi bayina ke na kati, basoda ya ntama na mvita yayi beto ke nwana, na yawu, beto ke bakula yawu, yina bima yayi kele. Mpamba ve mu ke tuba kima mosi samu na yawu, kana beno zola yawu.

¹³ Ntangu yayi, mu—mu zaba ti yayi ke kisika ve ya kutuba mambu yayi. Kasi samu konso muntu me tuba kima mosi, mu. . . Beno zaba, mpangi yina tubaka, mbuta-muntu yina ya ndombe tubaka, “Mu ke na kisika ya nene ve samu na kulonga.” Mu ke na *ntangu* mingi ve samu na kulonga. [Dibuundu me bula maboko—Mu.] Kasi mu ke baka kaka ntangu ya yinda.

¹⁴ Kilumbu mosi muntu mosi tubaka, yandi tubaka, “Longi mosi kwisaka awa na kisika ya malongi, yandi vwandaka pasteur ya yinzo-Nzambi yayi kubanda bamvula makumi zole. Mpe malongi ya yandi vwandaka ntangu nionso ya bamuniti makumi tatu ba Lumingu nionso na suka na yinzo-Nzambi ya yandi.” Mpe yandi tubaka, “Na Lumingu yayi na suka, yandi longaka na bangunga tatu.”

¹⁵ Mpe ba diacre bokilaka yandi, mpe tubaka, “Pasteur, ya kieleka beto ke sepela na nge.” Bawu tubaka, “Beto zaba ntangu nionso ti—ti nge me telema na lweka ya Biblia na bamuswa ya Yawu.” Mpe bawu tubaka diaka, “Mpe nge ke sungikaka beto na mutindu beto lunga kuwa ti beto me kuma ya kukondwa mvindu mpe ya bunkete na ntuala ya Nzambi. Mpe ya kieleka beto ke sepela na nge, mpe beto ke kwikila ti nge ke musadi ya Nzambi. Mpe beto me sepela na nsangu ya suka yayi. Kasi,” bawu tubaka, “kele na kima mosi yina beto zola yufula nge.” Bawu tubaka, “Beto pesaka nge ntangu, beto ba diacre.” Bawu tubaka, “Ba Lumingu nionso na suka nge ke bakaka kaka bamuniti makumi tatu, kasi bubu yayi nge me kwenda tii na bangunga tatu.” Bawu tubaka, “Ntangu yayi, bambuka moyo, beto me sepela na dilongi ya muvimba. Ya vwandaka mbote mingi.” Bawu vwandaka sala ti nkundi yayi ya mbuta kusepela, beno zaba.

¹⁶ Yandi tubaka, “Mbote, bampangi, mu ke zabisa beno kima mosi.” Yandi tubaka, “Konso suka na ntangu mu ke kwenda. . . Ba ke bokila munu na chaire,” yandi tubaka, “Mu ke tulaka mosi ya mwa ba bonbon yayi Life Savers na yinwa ya munu,” yandi tubaka, “mu ke manisaka yawu ve na kufiba.” Mpe yandi tubaka, “Na ntangu mu ke manisa na kufiba Life Saver yayi,” yandi tubaka, “ya ke baka kaka ba muniti makumi tatu,” mpe yandi tubaka, “na yawu mu ke sukisa dilongi ya munu.” Yandi tubaka, “Beno zaba, na suka yayi, ya me monana ti mu me lutisa ntangu. Mu me basisa yawu, ya ke bouton yina mu tulaka na yinwa.” [Dibuundu me seka—Mu.]

¹⁷ Mu ke tula kima mosi ve, mu banza ti beto ke na mwa ba bouton ve na bapokosi ya beto. Kasi beto ke. . . Mu banza ti yayi ke monana mafingu ve awa. Kasi mu ke kaka. . . Beno zaba, Nzambi mpe ke vwandaka na mutindu mosi ya bansaka, beno zaba.

¹⁸ Na yawu beto ke vutula matondo mingi na mutindu beto kele awa mpe kuvwanda na ntangu yayi ya kinkundi, mpe—mpe na ntangu yayi ya nene ya mbote samu na kukubika diaka Dimpa ya Luzingu, na mutindu ya munu mosi ya kuvedila. Mu zaba ti, ba théologien, mutindu muntu yina me katuka na Angleterre tubaka awa mazono na nkokila; oh, la la, mu ke na mpasi na kutuba na manima ya muntu ya mutindu yina, munu yayi me salaka kaka lukolo ya baleke. Kasi mu ke na kivuvu ti Nzambi ke tendula na beno ntendulu yina ke na kati ya ntima ya munu. Beno me mona? Kana bampova ya munu ke ya mbote ve, mabanza ya munu, mu—mu ke na kivuvu ti, yawu kele ya mbote.

¹⁹ Beto tanga ntangu yayi na Masonuku. Beno ke mingi yina zola landa. Mpe mu ke tanga na suka yayi, na mwa bantangu fioti, na Buku ya Jeremie, profete, kapu 2, mpe mu ke banda ntangu yayi na nzila ya 1.

Ndinga ya MFUMU kwisaka na munu, mpe tubaka,

Kwenda mpe boka na makutu ya Jerusalem, mpe tuba, Mutindu me tuba MFUMU; mu ke bambuka moyo na nge, na ntangu nge vwandaka diaka ntwenia, mpe zola ya nge na ntangu nge vwandaka fiancée, na ntangu nge vwandaka landa munu na ntoto ya kuyuma, mpe na ntoto yina ke butaka mbuma ve.

Israel kukisantisaka na MFUMU, ya vwandaka bambuma ya ntete ya bikunu ya yandi: bayina nionso vwandaka dia yawu. . . mpe bawu vwandaka ya kubwa; mpe bampasi vwandaka kubwa na zulu ya bawu, mutindu me tuba MFUMU.

Beno wa ndinga ya MFUMU, O yinzo ya Jacob, mpe mabuta nionso ya yinzo ya Israel:

Mutindu me tuba MFUMU, Yinki disumu ya nku batata ya beno monaka na munu, samu bawu me kwenda

ntama ya munu, mpe bawu me kwenda na bima ya mpamba-mpamba, mpe bawu kuma bantu ya mpamba-mpamba?

Bawu tubaka ve ti, Wapi MFUMU yina basisaka beto kuna na Egypte, mpe twadisaka beto na ntoto ya kuyuma, na ntoto ya kukondwa masa mpe ya kifuluka na mabulu ya yinda, na ntoto ya kuyuma, mpe ya bivudi ya lufwa, na ntoto yina muntu me lutaka ntete ve, mpe. . . muntu mosi ke zingaka ve?

Mpe mu me nata beno na yinsi ya kifuluka na bima, samu beno kudia bambuma ya yawu mpe bambuma ya kulutila kitoko; kasi na ntangu beno kwisaka, mpe tulaka mvindu, na yinsi ya munu, mpe salaka kimvwama ya munu busafu.

Mpe banganga-Nzambi tubaka ve, Wapi MFUMU? Mpe bantu ya misiku zabaka munu ve; mpe ba pasteur me sumuka na ntwala ya munu, mpe ba profete me pesa profesi na nzila ya Baal, mpe me landa bima ya kukondwa mfunu.

Yawu yina mu ke. . . nganina beno, me tuba MFUMU, mpe mu ke nganina bana ya bana ya beno.

Samu. . . kuna na yinsi ya Kittim, mpe beno tala; mpe beno tinda muntu mosi na Kedar; mpe beno tala mbote kuna, mpe beno tala kana ke na kima ya mutindu yina.

Kele na yinsi yina ke sobaka banzambi ya yandi, yina ke. . . na banzambi ve? kasi bantu ya munu me soba nkembo ya bawu samu na bima yina ke na mfunu ve.

Vwanda na ngitukulu, O zulu, samu na yayi, mpe beno vwanda na boma ya nene, . . . na kiadi, mutindu me tuba MFUMU.

Samu bantu ya munu me sumuka mbala zole; bawu me zimbana munu kiziba ya bamasa ya moyo, mpe bawu me timuna mabulu ya masa, mabulu ya masa ya kutobuka, yina lunga vwanda na masa ve.

²⁰ Bika ti Mfumu kuyika masakumunu ya Yandi na lutangu ya Bandinga ya Yandi. Mpe mu zola ku—kubaka dilongi kuna, mutindu, *Mabulu Ya Masa Ya Kutobuka*.

²¹ Beto me tanga, na Masonuku ya suka yayi; ti, Masonuku nionso me twadisama na mpeve. Mpe beto ke kwisaka na Yinzo ya Mfumu samu kusungama mpe kubakula. Mpe mbala yankaka beto ke mona ti. . . konso kima yina kele disakuba.

²² Mutindu soda yayi, na mwa ntangu fioti me luta, vwandaka tuba na beto mpe tubaka mwa bima mosi, ti mbala yankaka yinsi yankaka ke na mwa misile mosi, to—to kima mosi ya mutindu yina, mpe beto fwana kuzwa kima yina ke telemina yawu na—na kulanda mayeye ya basoda.

²³ Mbote, ya ke mutindu mosi na dibuundu, paroisise mosi sika wapi muntu mosi ke longaka, to mbala yankaka kana ya ke évangéliste na kisika ya malongi. Na ntangu yandi ke mona mupepe ya ngolo mingi, mpe kima mosi yina me banda ntama mingi ve, yina ke ya ntangu yayi, mbatukulu ya yawu to nionso yina yawu kele; muntu yina, kana yandi ke musadi ya Nzambi, yandi ke telemisa kima yayi ntama ya mabanza ya bantu samu bawu vwanda ntama ya yawu. Beto zola ve ti kima yina kusalama, beto vwanda ve na kisika ya mutindu yina.

²⁴ Ntangu yayi, na ntangu ya Jeremie kuna, profesu ya yandi, bamvula makumi sambanu lutaka kubanda lufwa ya—ya Esaie—Esaie. Mpe bamvula makumi sambanu lutaka ti bawu vwandaka na profete ya nene ve. Ya vwandaka na Habakuk mpe na mwa ba profete ya fioti, kasi Esaie vwandaka profete ya nene ya nsuka. Mpe bantu vwandaka, na ntangu yayi, vwandaka na mosi ve samu na kubasisa bawu. Bawu katukaka na kisika ya bawu. Mpamba ve, ata ti bawu vwandaka bantu ya Nzambi, bawu vwandaka diaka ve na kisika ya bawu tii na ntangu yina—yina beto ke mona bawu, na ntangu Jeremie ke kwisa pesa bawu profesu. Mpe Jeremie vwandaka diaka . . . Yandi pesaka profesu na ntwa kukwenda zinga na yinsi ya nzenza, mpe kwendaka na bawu diaka tii na yinsi ya nzenza.

²⁵ Na yawu, ya kieleka, Daniel kwisaka na manima ya Jeremie. Mpe Daniel tubaka ti yandi bakulaka, na nzila ya Masonuku, ti ba ke vwanda kuna bamvula makumi sambwadi.

²⁶ Ya kieleka, ya vwandaka diaka na profete yankaka na kati ya bawu, yina zolaka sala kizitu yina kuna, yina yandi tulaka na nkingu ya yandi, kutuba ti ya ke vwanda kima mosi ya fioti, ti na bamvula zole, mpamba ve, Nzambi ke vutula bawu nionso kuna, kasi Jeremie zabaka ti yina vwandaka kieleka ve. Mpe beto zaba yina salamaka na profete yina pesaka profesu ya luvunu, bawu fwaka kaka na mvula yina. Na yawu Nzambi bikaka yandi zinga ve.

²⁷ Mpe ntangu yayi beto nionso ke bakula mutindu ya bantu ya kilumbu yina. Ntangu yayi mu zola ve ti beno bakula munu yimbi, mu—mu me kana muntu ve, mu me kana . . . na yina mu zola tuba awa, mwa Masonuku mpe mwa masonama.

²⁸ Ntete mu vwandaka na kikalulu ya ku—kusonika Masonuku mpe nionso yina. Kasi kubanda mu me kuma na bamvula makumi zole na tanu na mbala ya zole, mbote, mu—mu ke bambuka diaka mambu ve mutindu ya vwandaka ntete, na yawu mu ke sonika Masonuku samu na kuzaba fioti, na nzila ya yawu, sika wapi mu ke kwenda. Mpe na yawu ke vwanda na ntangu mingi ya kusambila samu na bambevo, mpe nionso yina, mpe kuvwanda ntama, mu ke na ntangu diaka ve ya kulunguka mutindu mu lendaka sala yawu.

29 Ntangu yayi, kasi profete yayi ya nene ya bilumbu yina, vwandaka Jeremie, mpe yandi vwandaka fioti ya kufwanana na Amos mpe ba profete yina nionso kwisaka. Yandi bulanganaka na ntangu yandi monaka mutindu ya yinsi. Na kutala ti ya vwandaka na bisika . . .

30 Mbala yankaka na ntangu ba ke tubila yinsi mosi, ya lunga monana ti ba ke tubila kimvuka mosi. Ya ke mutindu yina ve. Ya ke kizizi ya yinsi ya muvimba. Mpe beto ke mona, bubu yayi, kifwanisu ya mambu ya bubu yayi mutindu ya vwandaka na bilumbu ya Jeremie, ti yinsi yawu mosi, na muvimba ya yawu, me kwenda, fioti, na kusambila biteki; na mutindu, mu lenda tuba, ya me kwenda ntama na Nzambi. Mpe kana yawu salamaka mutindu yina, ya ke samu na bantu ya kulemba na chaire. Samu, kana bantu yina ke na chaire vwandaka ya kusungama, na Ndinga ya Nzambi, Nzambi lendaka vwanda na konso dibuundu mutindu Yandi ke sala na kati ya beto awa. Kasi ba me nata bantu ntama ya yawu. Mpe yawu yina mu—mu zola tubila na suka yayi. Mpe ntangu yayi beto ke mona ti yina ke vwandaka ntangu nionso kieleka na bansungi nionso.

31 Mu ke kwikila ti ya vwandaka Amos, mutindu mu tubaka yawu na mwa ntangu fioti me luta, yina tubaka ti yandi vwandaka “profete ve, to mwana ya profete ve.” Kasi yandi tubaka, ti, “Na ntangu nkosi ke boka, nani ke vwanda na boma ve?”

32 Mpe muntu yina me waka ntete kuboka ya nkosi ya kieleka kuna na ntoto ya kuyuma, bayayi beno ke waka na mwa bayinzo ya lusansu awa ke kaka kudila ya niawu. Kasi na ntangu nkosi mosi ke boka kuna na ntoto ya kuyuma, bima nionso ke kubama. Mu vwandaka na mfinda ntangu ya yinda, samu na kuzomba bawu. Mpe ya ke ntinu ya baniama, mpe, na ntangu nkosi yina ke boka, ata mpe banzinzi ke yimbila diaka ve, bima nionso ke vwanda swi. Makelele ya bayimbwa ya nseke mpe ya banzudi, mpe baniama yankaka, mpe ba babouin mpe bamakaku, banzinzi, na mpasi beno mosi lunga banza; kasi nkosi mosi kuboka ntama kuna, mpe banzinzi nionso ke bika mazu. Beno me mona, bima nionso ke vwanda na boma ya yandi. Kasi, kele na bima mingi yina fwana kufwa yandi, kasi ba zaba yandi mutindu ntinu ya baniama.

33 Yandi tubaka, “Na ntangu nkosi ke boka, nani ke vwanda na boma ve?” Yandi tubaka, “Na yawu Nzambi me tuba, nani lunga pesa profesu ve?”

34 Mpe kuna, mu banza, diambu yayi ke fwanana na ntembe ya bubu yayi. Nzambi me tuba. Beno me mona? Mpe beto ke mona masonuku na bibaka ya mbanza, na yawu ya ke mpasi ve na kupesa profesu mpe kumona ti beto ke na ntangu ya nsuka.

35 Mpe beto ke mona Nzambi, na bimvuka nionso ya ba denomination, kubanda na dibuundu ya Catholique, na kulutaka

na mabuundu ya ba protestant, ba Bouddhiste mpe nionso yina, kubanda na Inde, mpe bisika nionso yankaka. Yandi ke bokila bantu ya Yandi na kuvukana, ya ke vukisa bawu kisika mosi. Mpe mu ke—mu ke na kiese mingi samu na yawu, na kumonaka kwizulu ya kilumbu yina. Ntangu yayi. . . Ya ke—ya ke kilumbu mosi ya nene, mosi ya bantangu ya kulutila kitoko.

³⁶ Ti, kana mu zabaka, kana mu zabaka ti yinza mosi vwandaka, na ntangu beto vwandaka bamwela kati ya Nzambi, yina beto kele, samu beto vwandaka na Yandi kubanda kusalama ya yinza. Samu, ke na mutindu mosi kaka ya Luzingu ya Kukonda nsuka, mpe ya zola tuba Nzambi. Mpe beto ke kitini ya Yandi. Beto vwandaka na kiyeka ya kuzaba ve mpe—mpe ya kubanza, mpe ya kuvwanda bantu; kasi yina beto vwandaka beto vwandaka yawu na mabanza ya Yandi, na ntwala kusalama ya yinza. Samu, beto ke kitini ya Yandi, mutindu mwana ya munu ke kitini ya munu, mpe mu ke kitini ya tata ya munu, mpe nionso yina. Beto ke bana ya Nzambi ya babakala mpe ya bakento, na mutindu ya Yandi ya kuzaba mambu na ntwala.

³⁷ Mpe na ntangu me luta, kana mu vwandaka na luzabu yina mu ke na yawu na ntangu yayi, mpe kana mu lendaka mona ntangu ya muvimba, mpe kana Ya lendaka tuba na munu, “Yinki ntangu nge zola zinga?” Mu zolaka soola kaka ntangu yayi, kaka na ntwala ya nsuka ya masolo ya yinza, mpe ya kwizulu ya Kimfumu ya Nzambi ke vwanda na zulu ya ntoto. Mu banza ti ntangu ya kulutila kitoko ya bansungi nionso, kele ntangu yayi.

³⁸ Beto ke mona awa ti ba me fundisa Israel na profete, na ntangu Nzambi pesaka yandi kiyeka mpe tumaka yandi kuna, bawu fundisaka bawu samu na masumu zole ya nene. Mpe beto zola tubila bima yayi zole bawu salaka. Mpe, na yawu, beto zola kwenda na ntwala na nzila ya yawu. Ntangu yayi, bawu kwendaka ntama na Nzambi, Kiziba ya masa ya moyo, mpe timunaka bawu mosi mabulu ya masa. Bawu kwendaka ntama ya kima yina Nzambi pesaka bawu, mpe bawu timunaka bawu mosi kima yina bawu mosi salaka. Mpe mabulu ya masa yayi, beno bambuka moyo, yina ya vwandaka na yawu, ya vwandaka ya kutobuka mpe vwandaka basisa masa.

³⁹ Ntangu yayi, dibulu ya masa ya kutobuka lunga kanga masa ve. Ya ke basisaka masa. Mu me sansuka na ferme, mpe mu zaba yina ke dibulu ya nkulu ya masa, mpe bampasi beto ke kutanaka na yawu.

⁴⁰ Mpe dibulu yayi ya kutobuka ke kizizi ya kieleka, mu banza, ya bilumbu yayi, ti na ntangu (beto) bima nionso yina beto ke meka na kusala, kuvukisa bantu, kutula bantu kisika mosi, kuvukisa mabuundu kisika mosi, ya me kuma kaka kumeka luzabu ya kimuntu. Beto mekaka na kusala ti ba Methodiste nionso kukuma ba Baptiste, mpe nionso yina, mpe

ba denomination ya mutindu na mutindu. Mpe yina vwandaka manaka ya Nzambi ve, na kubanda.

⁴¹ Nzambi ke na kisika mosi kaka ya lukutakanu. Ya tubaka kuna na Buku ya Exode, ti, “Mu me soola kisika ya kutula Nkumbu ya Munu, mpe ke kisika yina kaka Mu ke kutana na bantu.” Mpe Yandi soolaka kisika mosi samu na kutula Nkumbu ya Yandi. Mpe kisika yina Yandi tulaka Nkumbu ya Yandi, kele kisika yina Yandi kutanaka na Israel. Yandi ke na kisika yina Yandi ke kutana na dibuundu ya Yandi bubu yayi, mpe Yandi soolaka Nkumbu yango, mpe Nkumbu yango kele Yesu Klisto. Mpe kele kisika yina Yandi ke kutana na mukwikidi ya kieleka, na ntangu yandi ke na Yesu Klisto. Ke kisika yina Nzambi soolaka na kutula Nkumbu ya Yandi.

Beno ke tuba, “Nkumbu ya Nzambi?”

⁴² Yandi tubaka, “Mu kwisaka na Nkumbu ya Tata ya Munu.” Na yawu kisika Nzambi tulaka Nkumbu ya Yandi, vwandaka na Klisto. Mpe na Klisto ke kisika beto nionso lunga kutana na nsi ya Menga yina mwanganaka, mpe kuna beto ke na kinkundi ya kulutila mbote, mpe ya kieleka.

⁴³ Nzambi salaka manaka ya Yandi na mbatukulu, na disamba ya Eden, sika wapi Yandi lenda kutana na muntu, mpe ya vwandaka ve na lubakusu ya kimuntu; kana ya vwandaka mutindu yina, Eve lendaka fwanana na manaka ya Yandi. Kasi beto zaba ti yandi ndimaka mayele ya Satana, “Ya kieleka, Nzambi ke sala yawu ve,” kasi Nzambi tubaka ti Yandi lenda sala yawu! Mpe ke mutindu yina Yandi soolaka kisika ya mpulusu, mpe ya vwandaka na nzila ya Menga, kasi na mayele ve.

⁴⁴ Na yawu beto lunga sala nionso, kasi ya ke kaka nkadulu ya kimuntu ti—ti bantu ke meka na ku—kusala kaka mutindu yina. Kana beto vwandaka na ntangu, beto lendaka tendula yawu mbote-mbote, kasi mu zola baka bouton yina ve. Na yawu beto lenda vedisa yawu, “mabulu ya masa ya kutobuka.” Mpe beto ke mona ti ya me—ya me salama diaka, ya ke kizizi ya kieleka ya nsungi ya beto yina beto ke zinga, nionso yina beto ke meka.

⁴⁵ Mpe kukondwa kumona mpamba bangolo nionso ya musadi ya Nzambi, ata ti ya ke bokila Nkumbu ya Yesu Klisto. Ba fwana zitisa yandi samu kaka ya ke bokila Nkumbu ya Yandi na lukumu mpe luzitu. Mpe ata ti bimvuka ya nene ya kupanza nsangu yina me tambula na yinza ya muvimba, mpe nionso yina, na bilumbu yayi ya nsuka, mu banza, beto lunga vwanda na kiyeka ve ya kusala ti bantu kuvwanda na ntima mosi tii kuna beto ke nata bawu na nsi ya Menga ya Yesu Klisto. Yina ke kisika mosi kaka beto ke vwanda na lukengu.

⁴⁶ Ntama mingi ve muntu mosi bokilaka munu, kuna na Este, mpe tubaka, “Mpangi Branham, mu me wa ti nge me kwenda na—na Arizona, mpe nge me sala yawu kisika mosi ya lukengu.” Mpe beno zaba mutindu Nsangu ke kwisaka, mpe Mfumu tubaka

na munu yina lunga salama kuna na Alaska, mpe yinki mutindu ya ke vwanda kuna na Californie, mpe ya me salama mutindu yina. Bawu tubaka, “Ntangu yayi kana ya ke tekita, mpe nionso yina, wapi ke kisika ya lukengu?”

47 Mu tubaka, “Mu zaba kaka kisika mosi ya lukengu. Ya ke na Klisto. Samu bayina nionso ke na Klisto, ke . . .” Yawu yina kaka mu zaba.

48 Ntangu yayi ba bokilaka Jeremie, mpe, “profete na mansanga na meso.” Mpe samu, mu ke kwikila, yina salaka ti profete yayi kudila—kudila, na kutala ti, ya vwandaka profete (mpe Ndinga ya Mfumu ke kwisaka na bawu) mpe yandi vwandaka mona bantu ke landa binkulu ya bawu, mpe bawu banzaka ti ba vwandaka sala mbote, mpe ya vwandaka ve na mutindu ya kuvutula bawu na nzila.

49 Na yawu, bawu vwandaka kwenda mbala mosi na yinsi ya nzenza, samu beto ke buka kaka bambuma yina beto mwangaka, kukondwa kutala yina beno kele, nionso yina beno kele. Mpe beto mutindu yinsi yina bukaka bambuma, to, yina ba mwangaka, na yina, mpe beto ke buka mbuma. Mbasi mu ke zonzila, kana Mfumu kuzola, na manima ya midi, *Mpasi ya Misongo*; mpe mu—mpe mu ke tubila yawu kuna, ti beto ke luta na lweka na yawu ve. Beto ke buka mbuma yina beto mwangaka.

50 Mpe kana Nzambi beto ve kitumbu bubu yayi na mutindu beto me soba Kimuklisto bubu yayi, mpe beto me bebisa bantu na kukotisaka bawu na Kimuklisto yinwa, mutindu Mpangi Moore tubaka yawu kilumbu mosi ti, “Ya ke tindama na ngolo nionso na kuvumbula na lufwa Sodome na Gomorrhe, mpe kulomba bawu pardo samu ya yokaka bawu na tiya.” Ya kieleka, samu Nzambi ke ya kieleka. Mpe sika wapi luvunu kele; ya ke—ya ke lombamba bantu ya Yandi mpe Ndinga ya Yandi samu Yandi sala ti bantu kubuka mbuma yina bawu mwangaka, mpe ya ke salama mutindu yina na beto.

51 Ntangu yayi beno bambuka moyo ti bawu bikaka Yandi, Kiziba ya bamasa ya moyo, mpe timunaka bawu mosi mabulu ya masa.

52 Ntangu yayi ya lunga vwanda awa na muntu yina zaba ve yina ke dibulu ya masa. Dibulu ya masa ke tanki yina me salama na maboko ya bantu yina ke meka kubaka kisika ya dizanga ya masa. Ya ke kima yina muntu mosi me timuna. Mpe yikwa zaba yina ke dibulu ya masa? Mbote. Mbote mingi, ya ke na bantu mingi ya banseke na suka yayi awa. Na yawu bawu . . . Mu ke bambuka moyo na dibulu ya masa na kisika mosi kuna, mutindu ya vwandaka, mpe mu vwandaka ntangu nionso na boma na kunwa na kima ya mutindu yina. Yawu vwandaka tanki yina me salama na maboko ya bantu. Mpe ba lunga tudila yawu ntima ve. Beno lunga tula ntima ve na dibulu ya masa.

53 Ntangu yayi kima yina nionso muntu me sala ke vwandaka mbote mingi ve. Kasi mutindu Mfumu vwanisaka ntangu na—na—na bansungi ya yawu, mpe kubaluka ya ntoto; konso mvula, konso nsungi, konso kilumbu, konso ngunga, mpe kulala ya mwini, mpe ya ke bwaka ata fioti ve. Kasi bamontele nionso ya kulutula kitoko beto lunga vwanda na yawu, ya ke kondwa bamuniti mingi na ngonda mosi, ya kieleka. Kasi, beno tala, bima nionso Nzambi ke salaka kele ya kulunga, kasi yina muntu ke salaka ke vwandaka ya kulunga ve. Na yawu samu na yinki kundima yina muntu me sala, na ntangu beno lunga baka yina ke ya kulunga?

54 Mu ke tubaka ntangu nionso mutindu yina samu na beto ba Pentecotiste. Beno me mona, beto zaba, mpe beto ke—beto ke na nganda ve ya ndonga, ya Nzambi, beto ke banza mutindu yina ve; kasi beto zaba diaka ti na kati ya beto kele na bantu yina ke meka na kumekula bantu yankaka. Yina ke kimuntu. Ba ke meka na kusala mutindu yina. Bawu salaka yawu na kati ya Biblia, “Mosi, ‘Mu kele ya Paul,’ ‘Mu kele ya Silas,’” mpe nionso yina. Kasi bawu ke—bawu ke meka na kumekula yina muntu yankaka salaka to kele na kusala.

55 Kasi samu na yinki beno lunga ndima kumekula ya yimbi, na ntangu mazulu me fuluka na kima ya kisina, na ntangu “nsilulu ke samu na beno mpe bana ya beno”? Samu na yinki beto lunga ndima kima ya luswaswanu? Samu na yinki beto lunga baka credo to dogme mosi, na ntangu Biblia ke Ndinga ya Nzambi ya kukondwa mvindu? Samu na yinki beto lunga meka na kuyika to kukatula na yawu, na ntangu Mfumu Yesu tubaka na Apocalypse 22:18, “Yina nionso ke katula Ndinga mosi na Yawu, to ke yika ndinga mosi na Yawu, ba ke katula ndambu ya beto na Buku ya Luzingu”?

56 Na ntangu Nzambi tulaka muntu na zulu ya . . . na zulu ya ntoto, Yandi tubaka na bawu na kuzinga na Ndinga ya Nzambi. Ntangu yayi Ndinga ya Nzambi me fwanana na muniololo mosi, beno ke zabuka na Yawu difelo; mpe kaka mutindu miniololo ke vwandaka ngolo na dinu ya yawu ya kulemba, mpe Nzambi zola ti beto keba konso Ndinga ya Yawu. Na yawu yina vwandaka mbatukulu ya Biblia; na ntangu bawu bukaka Ndinga mosi kaka, yawu kotisaka bantu nionso na kati ya mudidi ya lufwa.

57 Yesu kwisaka na kati ya Biblia, mpe Yandi tubaka ti, “Muntu ke zinga kaka ve na dimpa, kasi na Ndinga nionso.” Na kitini ya Bandinga kaka ve, to makumi yivwa na zulu ya nkama mosi; kasi na Ndinga nionso, kaka mutindu Eve na Adam vwandaka.

58 Mpe na nsuka ya Biblia, na Apocalypse 22:18, Yandi tubaka ti, “Yandi yina ke katula Ndinga mosi na Yayi, to ke yika ndinga mosi na Yawu!”

59 Ntangu yayi samu na yinki beto zola kotisa na Yawu mabanza ya muntu mosi, na ntangu yayi ke Mabanza ya Nzambi

Yandi mosi? Beto ke na nsatu ya kubaka yina Yandi tubaka. Mpe ya me sonamaka, “Bika ti bandinga nionso ya muntu kuvwanda luvunu, mpe ya Munu kaka kuvwanda Kieleka.”

⁶⁰ Yawu yina vwandaka diambu na profete yayi. Na bilumbu ya Jeremie, yandi vwandaka profete, yandi vwandaka na Ndinga ya Mfumu. Mpe kuvwandaka na mpangi yayi yina vwandaka meka na kukotisa kima mosi na Yawu. Mpamba ve, ba lenda tula ntima na yawu ve. Mpe mu ke fwanikisa batanki yayi ntangu yayi na ba systeme yayi beto ke meka na kubaka, mpe yina ke meka na kubaka kisika ya kisina ya Ndinga ya Nzambi.

⁶¹ Samu, kima mosi ve lunga baka kisika ya Yawu. Ya ke Nzambi. “Na mbatukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nzutu mpe zingaka na kati ya beto.” Mpe Hebreux 13:8, ke tuba, “Yandi ke mutindu mosi mazono, bubu yayi, mpe kukonda nsuka.” Wapi mutindu beto lunga luta na lweka na Yawu? Ya fwana vwanda kaka Kieleka. Ya kele kaka mutindu mosi. Ya kele kaka mutindu mosi na mutindu ya yandi ya kusala.

⁶² Kikuma yawu yina beno ke sepela na Yawu, beno ba Baptiste mpe ba Methodiste, mpe ba Catholique mpe ba Presbyterien, mpe nionso yina, ke sepela kuvwanda na Ntwala ya yina. Kisika mosi kuna, na kati ya beno, beno me ndima Nzambi. Mbala yankaka na mutindu ya mayele ya kimuntu, mbala yankaka beno waka Ngolo ya Nzambi, ti beno ke musadi ya Nzambi; kasi na ntangu beno lunga kwisa ya kieleka na Nzambi, mpe kuzaba kisika ya beno na kati ya Yandi, mutindu mwana ya Nzambi ya bakala to ya kento, yawu yina ke pesa beno kiese ya nene, yina Nzambi kubikaka samu na beno.

⁶³ Beno bambuka moyo ntangu yayi na Santu Marc, kapu 16, Yesu tubaka ve ti, “Beno kwenda na yinza ya muvimba, mpe—mpe—mpe pesa malongi.” Yandi tubaka, “Beno kwenda longa Nsangu ya mbote.” Kulonga Nsangu ya mbote, kele, kutalisa Ngolo ya Mpeve-Santu! “Beno kwenda na yinza ya muvimba, mpe beno talisa Ngolo ya Mpeve-Santu.”

⁶⁴ Mu vwandaka tuba na mpangi-bakala mosi, mosi ya bantu yina ke simbisaka ba . . . lukutakanu ya munu na Inde, na Bombay kuna, kuna na Afrique du Sud mpe bisika ya mutindu na mutindu, sika wapi ba missionnaire longaka Yawu mutindu ndinga to mutindu mabanza ya kimuntu. Kasi kilumbu mosi na kati ya lukutakanu, na ntangu Mpeve-Santu kulumukaka, Yandi mosi, mpe vulusaka bantu-ndombe ya kisina mafunda makumi tatu na lubokilu mosi na autel, mpe na kisika yina bawu vwandaka. Kuvwandaka na bakento ya kutelema kuna, yina vwandaka kinkonga mutindu bawu butukaka, mpe kaka na ntangu yina bawu telemisaka maboko ya bawu samu na kuyamba Klisto. . .

⁶⁵ Mpe Mpeve-Santu kulumukaka kuna mpe belusaka na mbala mosi bantu mafunda makumi zole na tanu, na bakiti ya bambevo, ba civière mpe ba brancard. Kilumbu yina landaka, mfumu ya mbanza bokilaka munu, samu na kutala ba camion yina vwandaka luta na bala-bala ya kufuluka na bima yayi.

⁶⁶ Bakento yina vwandaka kuna, kinkonga, nkatu kuzaba ti bawu vwandaka kinkonga. Kasi kaka na ntangu Mpeve-Santu simbaka bawu, bawu kukifikaka maboko ya bawu mpe kwendaka ntama ya babakala ya bawu.

⁶⁷ Mpe mu ke kukiyufula yinki mutindu beto na Amerique ke kukibokila beto mosi yinsi ya Baklisto, ti beto ke na Ntwala ya Nzambi; mpe beto na konso mvula, bakento ya beto, ke katula bilele mbala na mbala. Kasi na kutala mbote ba lendaka lwata bilele mbala na mbala. Na konso ntangu beno ke lwata Klisto, na konso ntangu beno zaba mbote-mbote mutindu beno kele. Na ntangu nionso mu ke mona mutindu bantu ke sala na bala-bala, mu ke kukiyufula kana ba ke ya kieleka na mabanza ya mbote. Ya ke monana ti ba ke mona ve ti na ntangu nionso ba ke sala mutindu yina, yina ba ke sala, ba me kuma pambu ya diabulu, samu na kutinda mioyo ya bawu na difelo. Ya kieleka. Kasi yinza kele na kati ya kubeba mutindu ya vwandaka na bilumbu ya Jeremie.

⁶⁸ Ntangu yayi beto vutuka kuna na dibulu ya masa. Ntangu yayi, ba lenda tula ntima na dibulu ya masa yayi ve samu ya lenda kukifulusa yawu mosi ve. Mpe ya ke tulaka ntima na ba bamvula ya bwala awa samu na kufulusa yawu, bamvula ya bwala to ba reveil yayi awa, samu na kuvwanda na mwa reveil mosi awa mpe mwa reveil yankaka *kuna*, to nionso yina, samu na kufulusa yawu. Na yawu ba ke tulaka ntima na yawu ve. Ya lunga ve kukifulusa yawu mosi. Ya me lunga ve, na yawu mosi. Ya lunga sala yawu ve. Mpe ya ke tulaka ntima na bamvula, samu na kufulusa yawu.

⁶⁹ Na yawu beto tala sika wapi ya ke—ya ke bakaka mvula ya yandi, wapi ya ke bakaka masa ya yandi, dibulu ya masa. Ya ke katuka na bidikilu, na banganda, sika wapi baputulu na bamvindu nionso ke bwa kuna, mvula ke nata yawu, mpe ke kulumusa yawu mbala mosi na dibulu ya masa, tanki yina me salama na maboko ya bantu. Ya me kuma mutindu dibulu mosi ya mvindu. Mpe ya ke kulumuka na muludi ya kidikilu sika wapi kele na baniama ya mutindu na mutindu, na bansudi ya yinzo ya bandeke, mpe nionso yina, mpe ke vwandisa yawu kuna. Mpe na ntangu mupepe ke bula nionso yina mpe ke kulumusa putulu yina na zulu ya kidikilu, na yawu mvula ke noka mpe sukula yawu, mvula, ke kulumusa nionso yina.

⁷⁰ Mpe masa yina me twadisama na mudidi yina me salama na maboko ya bantu mpe ke luta na tiyo yina me salama na maboko ya bantu, tii na tanki yina me salama na maboko ya

bantu. Mpe na ntangu ya ke kuma kuna, ya ke vwanda mvindu mingi, mvindu mingi ti beno ke tula kiyungulu mosi na zulu ya yawu, kana ve beno lunga nwa yawu ve. Ntangu yayi, beno tala, ya ke kulumuka na muludi, ke luta na mudidi yina me salama na maboko ya bantu, na tiyo yina me salama na maboko ya bantu, tii na tanki yina me salama na maboko ya bantu. Mpe ba ke tula kiyungulu mosi na zulu ya yawu, samu na kukanga mwa banzini mpe bima yina nionso ke na masa.

⁷¹ Ntangu yayi, beto ke mona ti, na bima yayi, na mwa bilumbu fioti na ntangu masa me vwanda kuna, na mwa denomina- . . . yayi ya bantu, to, tanki yayi. Beno lemvokila munu. Beno lemvokila munu. Mbote mingi. Na manima ya me—na manima ya me kulumuka kuna, na ba theologie ya mutindu na mutindu mpe bima yina nionso me kulumuka na yawu; ntangu yayi beto ke mona ti, na ntangu yawu ke vwanda kuna mwa bilumbu, ya ke ningana diaka ve.

⁷² Mpe muntu nionso kuzaba, na masolo ya dibuundu, na ntangu Nzambi ke tinda kima mosi, nsangu mosi, mpe ke kwisa na bumalu-malu na Nzambi, mpe na manima ya luzingu ya muntu yina bandaka yawu (to nionso yina ya lunga vwanda, beno lunga bokila yandi reformateur, to nionso yina beno zola tuba samu na yawu), na manima ya lufwa ya yandi, ba ke sala système mosi mpe ba ke sala organisation mosi. Mpe kaka na ntangu ba ke sala yawu organisation mosi, yawu ke fwa. Ya ke telema ata fioti diaka ve. Yawu yina salamaka na bantangu nionso, kuna manima, ntama kuna na manima.

⁷³ Samu na kupesa na luzitu na nganga-Nzambi yayi ya Catholique yina me vwanda awa; na ntangu Nzambi salaka organisation na dibuundu. . . to, salaka yawu organisation ve, Nzambi salaka ata fioti ve organisation mosi na dibuundu. Yandi ke na kima ya mutindu yina ve. Yandi ke na lubutuku, na organisation ve. Na yawu, na ntangu Nzambi bandaka dibuundu kuna na Kilumbu ya Pentecote. Mpe kuna na Nicée, na Rome, bawu salaka yawu organisation mosi, mpe kele kuna sika wapi yawu zimbisaka Ngolo ya yawu.

⁷⁴ Na yina beto ke kuma na ntangu ya kusungika ya ba Lutherien, mpe ya vwandaka kima mosi ya nene. Ndinga ya Nzambi pesamaka, “Muntu ya mbote ke zinga na lukwikilu.” Mpe na ntangu bawu salaka mutindu yina, na kisika ya kuyela, bawu nionso, kukwenda na ntuala bawu nionso, bawu salaka dibuundu ya ba Lutherien, bawu kabwanaka na kimvuka yayi, mpe ya vwandaka lufwa.

⁷⁵ Na yina Nzambi basisaka John Wesley, na kusantisama, nsangu ya kisalu ya zole ya lemvo, mpe ya vwandaka kima mosi ya kitoko mingi. Kasi na manima ya Wesley mpe Asbury, bawu salaka organisation, mpe ya yawu fwaka.

⁷⁶ Mpe kuna kwisaka ba Pentecotiste na kuvutuka ya makabu. Bawu salaka mbote, yinki salamaka? Ba salaka yawu organisation mosi mpe yawu fwaka. Ya kieleka.

⁷⁷ Ntangu yayi na kati ya nionso yayi, Nzambi ke basisa kaka ndambu na bansungi yina nionso. Ya kieleka Yandi ke sala yawu. Mpe yayi ke ntangu ya beto ya kubasika, ya kuvukana kisika mosi. Mpe yina mu banza, Bantu ya Mumbongo ya Nsangu ya mbote Muvimba salaka kisalu mosi ya nene na kubuka bibaka yayi, mpe samu na kutuba ti, “Kele na luswaswanu mosi ve na kati ya beto. Beto vukana kisika mosi mpe beto sambila Nzambi na nzila ya ndiatulu mosi, na nzila ya organisation mosi ve.” Kana yawu vwandaka organisation mosi, mu ke katuka na kisika ya malongi kaka na ntangu yayi. Mu ke na kima ya kusala na yawu ve.

⁷⁸ Yinki yawu kele, ya fwana vwanda kaka ngwisani, mpe ngwisani ya credo mosi ve, kasi ngwisani ke kati na Klisto, na ngolo ya mvumbukulu ya Yandi. Yawu yina kima ke nata Luzingu, ya ke nata lubutuku.

⁷⁹ Mpe na ntwala lubutuku kukwisa, beto ke mona ti ke vwanda na lufwa na ntwala ya lubutuku. Mpe lubutuku ke kima mosi ya mvindu, yawu vwanda konso lubutuku yina. Ata ti ya ke na yinzo ya bangulu, to—to kisika nionso yawu kele, ya ke mvindu. Mpe Lubutuku ya mbala zole ke mutindu yina, ya ke nata beno na kusala mambu yina beno vwandaka sala ve na ntwala. Kasi na ntangu beno me kubama na kufwa na beno mosi, na yawu beno me butuka diaka, muntu ya malu-malu kati na Klisto Yesu, na yina bima, ke zibuka mpe luzingu ke kuma ya malu-malu samu na beno, samu beno me ndima Muntu yayi Yesu Klisto, kasi mwa théorie to mwa credo ve.

⁸⁰ Mpamba ve, ata mpe na Ndinga yina me sonama, Ya fwana baka kaka luzingu na nzila ya Mpeve-Santu. Mu ke tala ve theologie yina beno ke na yawu, ya me vwanda kuna ya kufwa. Mu lunga vwanda na mwa masangu na diboko; kasi kana yawu landa ve nzila yina yawu lunga baka luzingu, mbuma ya disangu yina ke zinga ata fioti ve. Mpe beno lunga vwanda na diplome ya docteur, na Philosophie, na Droit, mpe nionso yina beno zola; kasi kana Mpeve-Santu kunata yawu ve na kubaka luzingu na kati ya beno, mutindu nzingilu ya beno mosi na Nzambi, na yawu mbuma ya disangu ke vwanda na mfunu ve. Mayele ya beno ke vwanda na mfunu ve.

⁸¹ Mutindu muntu yayi ya Angleterre tubaka awa kilumbu yina na nkokila, mu vwandaka na ngitukulu mingi samu na yawu. Mayele nionso ya vwandaka na yawu, mutindu Paul, ya fwanaka zimbana nionso yina yandi zabaka, samu na kumona Klisto, kusala mambu yina yandi banzaka ve ti yandi lendaka sala.

⁸² Kasi yina ke mutindu Nzambi ke salaka, Yandi ke kulumusa beto na systeme ya beto ya lukolo. Mu ke simbisa ve kukondwa

kulonguka, kasi mu ke meka na kutuba na beno luswaswanu. Malongi ya lukolo lunga nata Luzingu ata fioti ve. Ya ke lomba Mpeve ya Nzambi samu na kunata Luzingu, mpe Luzingu yina ke kwisa ve na nzila ya reveil mosi ya lukolo. Ya fwana kwisa kaka na Biblia, reveil ya Ndinga, mpe Ndinga yina ke mutindu mosi mazono, bubu yayi, mpe kukonda nsuka. Mpe na ntangu Ya ke bwa bubu yayi, mpe ke baka luzingu, beno ke baka mvutu yina mosi bawu bakaka na Actes 2. Ya kieleka. Ya ke vwanda na yawu ntangu nionso, ya ke vwanda mutindu yina ntangu nionso, samu ya ke Mpeve ya Nzambi yina ke nata atimosifere.

⁸³ Ya fwana vwanda kaka na atimosifere mosi na kusala mambu. Yawu yina ba ke longusa beno ntangu nionso, “Beno nata bana ya beno awa.” Mbote, ya kieleka yina ke mbote. Mu vwandaka na kiese na kumona mwana ya munu ya kento, Rebekah, yina me kwisa mpe me vwanda, na mwa ntangu fioti me luta. Mingi kati ya beno monaka munu kusala mbwetelo ya meso na kento mosi, ya vwandaka mwana ya munu ya kento, na yina yandi kotaka mpe vwandaka. Mu zola ti yandi baka mbotika ya Mpeve, mpe kikuma yawu yina yandi kele awa na lukutakanu. Yawu yina kikuma ya yawu. Ya ke nata atimosifere.

⁸⁴ Mutindu Docteur Bosworth vwandaka tuba, “Beno lunga baka diki ya nsusu mpe beno tula yawu na nsi ya mwana ya yimbwa, ya ke pasula mwana ya nsusu.” Samu na yinki? Samu ya ke diki mosi mpe me kutana na atmosphere mosi ya mbote.

⁸⁵ Ya ke na mfunu ve samu na munu kana beno kele Methodiste, Baptiste, Presbyterien; na atimosifere mosi ya mbote, ya ke pasula mwana ya Nzambi ya malu-malu. Ya ke atimosifere yina me sala yawu, mu ke tala ve kidimbu ya denomination ya beno.

⁸⁶ Mu vwandaka vukisa baniama. Mu vwandaka tala sinzidi ya mfinda na ntangu beto vwandaka matisa bawu na mfinda, kuna na—kuna na bilanga ya madia ya baniama, samu na kutula bawu na mfinda mosi. Yandi telemaka kuna mpe vwandaka tala bawu ke luta na mwelo, yina vwandaka sadisa na kukota na lupangu ya baniama. Yandi salaka keba ve na bidimbu, samu ya vwandaka na bidimbu ya mutindu na mutindu yina vwandaka luta kuna. Kasi ya vwandaka na kima mosi yina ya vwandaka landila mbote-mbote, kidimbu ya menga. Ya fwanaka kaka ti niama kuvwanda ya Hereford ya kisina mbayi-mbaya ya lendaka kota ve na mfinda yina, samu ya vwandaka kaka Kimvuka Hereford yina vwandaka disa baniama na mfinda yina. Ya fwanaka vwanda kaka na kidimbu ya menga, samu na kukeba mbote-mbote mutindu ya baniama yina.

⁸⁷ Mpe mu banza ya ke vwanda mutindu yina na Kilumbu ya Lusambusu. Yandi ke yufula munu ve kana mu vwandaka Methodiste, Baptiste, Pentecotiste, to Presbyterien, kasi Yandi ke tala kaka kidimbu ya Menga. “Kana Mu mona Menga Mu ke luta na zulu ya beno.” Yawu yina beto ke na yawu nsatu.

⁸⁸ Na yina beto ke mona ti mabulu ya masa yayi, na manima kuvwanda kuna na mwa ntangu fioti, ya ke. . . ya ke ningana ve mpe ya ke na mfunu diaka ve. Mpe ya me kuma, diaka, kisika ya makototo na miseleketete na banioka na banzinzi mpe bamikolobo, mpe nionso yina, samu bima yina ke zolaka mvindu ke kwendaka kuna. Beno lunga banza, yina ke kulumukaka na muludi ya kidikilu mosi, to ya yinzo yina ke pene-pene ya kidikilu mosi, to bisika nionso yina mvindu kele, banzinzi mpe bamikolobo ya mutindu na mutindu, mpe bima nionso, yina ke kulumuka na dibulu ya masa?

⁸⁹ Ntangu yayi, yayi ke mbandu mosi ya kulunga ya systeme yina nionso me salama na maboko ya bantu. Yandi ke ya kubwa, na kubanda. Kikuma yawu yina ya ke na nsatu ya Mvulusi. Ya lunga ve kukivulusa yandi mosi, ya lunga sala na yawu kima mosi ve. Ya me zimbana, na kubanda. Yandi kwisaka na yinza, nsumuki, yandi kwisaka na yinza ke tuba baluvunu. Yandi ke nsumuki, na kubanda, na yawu yinki mutindu ya lunga kukisadisa yandi mosi? Yinki mutindu muntu ya santu lungaka sala yawu?

⁹⁰ Kele na muntu ya santu ve. Kele na dibuundu ya santu ve. Ya ke kaka na Mpeve-Santu! Kele na muntu ya santu ve, bantu ya santu; ya ke Mpeve-Santu na kati ya bantu, yawu yina ya kele. Amen. Ya ke na mongo ya santu ve sika wapi Pierre na bayankaka telemaka; mongo vwandaka ya santu ve. Kasi ya ke Nzambi ya santu, na zulu ya mongo, yina ke sala yawu ya santu. Ya ke na muntu ya santu ve; ya ke Mpeve-Santu yina ke sadila muntu yina, yawu yina ke sala yawu ya santu. Ya ke muntu ve; kasi Muntu yayi Mpeve-Santu! Ya ke muntu ve; samu, ya ke kaka muntu, “yina me butuka na masumu, yina ba me buta na masumu ya nku, yina me kwisa na yinza na kutubaka baluvunu.”

⁹¹ Ba systeme yina nionso me sala ke kanga yandi mosi kuna. Ya ke fwa meso ya mayele ya lukolo, meso ya mayele ya lukolo, tii kuna bawu ke tuba ti, “Mu ke vwandaka mosi ya dibuundu kapanda, nkumbu ya munu ke na kati ya buku. Mu salaka *yayi*. Tata ya munu vwandaka *yayi*, mpe nionso yina.” Yina ke wakana mbote mingi; yina, ke mbote, mu ke telemina yawu ve. Kasi tala, nkundi ya munu, Yesu tubaka, “Kana muntu me butuka mbala zole ve, ya lunga mona ata fioti ve,” *kumona*, kuna, ya zola tuba ve ti yandi ke tala na meso ya yandi, kasi, “*kubakula* Kimfumu ya Zulu.” Tii kuna beno ke kota kuna na nzila ya lubutuku mosi!

⁹² Wapi mutindu evangeliste yayi ya Baptiste lendaka, wapi mutindu muntu yina me vwanda kuna mpe ke sawula mpe ke seka Yawu? Beno tala, kele na kima mosi ve na kati ya yandi yina lendaka ndima Yandi; kasi Nzambi fwana sala yawu kaka, beno me mona. Nzambi pesaka yandi Mpeve-Santu. Yandi talisaka ti yayi vwandaka luvunu ve, yayi ke Ndinga. Yandi ke wa yawu kaka na makutu ya mabanza ya lukolo, mpe bawu ke meka na

kubaka masakumunu nionso ya Nzambi mpe ke tula yawu samu na bilumbu yina me luta.

⁹³ Longi mosi ya ntwenia ya Baptiste, ntama mingi ve awa, yina kele ya kuvwanda awa na suka yayi; mpe yandi kwisaka na munu, mpe yandi tubaka, “Mpangi Branham, ke na kifu mosi nge ke na kusala.”

Mu tubaka, “Sadisa munu.”

⁹⁴ Mpe yandi tubaka, “Nge kele, mu banza nge ke ya kuvedila mpe muntu mosi ya mbote, kasi . . .”

Mu tubaka, “Matondo na nge, tata.”

Yandi tubaka, “Kasi kele na kifu mosi nge ke na kusalaka.”

Mu tubaka, “Mu banza ti Mfumu mpe me mona kifu mosi.”

⁹⁵ Mpe yandi tubaka, “Mbote, kele na . . . Tala kima yina nge ke salaka yina kele kifu.” Yandi tubaka, “Nge ke meka na kukotisa na yinza ministere ya bantumwa, mpe,” yandi tubaka, “ministere ya bantumwa sukaka na bantumwa.”

⁹⁶ Mu tubaka, “Mutindu Baptiste na Baptiste, mu zola yufula nge kiuvu mosi.”

Yandi tubaka, “Yinki yawu?”

⁹⁷ Mu tubaka, “Nge ke kwikila ti Ndinga ya Nzambi me twadisama na mpeve, konso kitini ya Yawu?”

Yandi tubaka, “Kasi, ya kieleka.”

⁹⁸ Mu tubaka, “Na yawu, Yandi tubaka, ‘Beno yika ndinga mosi ve, to kukatula Ndinga mosi.’ Mpamba ve,” mu tubaka, “mu ke tuba na nge ntangu wapi Lusakumunu ya bantumwa kulumukaka na zulu ya bantu, na kulanda nsilulu ya Nzambi, ntangu yayi talisa na munu nsilulu ya Nzambi yina ke ndimisa ti yawu me katukaka na zulu ya bantu. Beno me mona, kana nge lunga talisa yawu ve na nzila ya Ndinga, na yawu—na yawu zimbana yawu, beno me mona,” mu tubaka, “samu Ya ke kwenda kaka na ntwala.”

⁹⁹ Yandi tubaka diaka ve na mwa bamuniti fioti. Mpe na yawu mu tubaka, “Mbote, na yawu, mpangi ya munu, mu zola yufula na nge kima yayi. Pierre talisaka nsangu ya bantumwa, na Kilumbu ya Pentecote. Mpe beto nionso zaba ti yina ke kieleka, samu ya vwandaka na bafungula ya Kimfumu ya mazulu, yina Yesu pesaka yandi. Mpe ntangu yayi beno tala mbote-mbote yina yandi tubaka. Yandi tubaka, ‘Beno balula bantima, beno nionso, mpe beno baka mbotika na Nkumbu ya Yesu Klisto samu na lemvo ya masumu, mpe beno ke yamba dikabu ya Mpeve-Santu. Samu nsilulu ke samu na beno, mpe bana ya beno, mpe bayina nionso ke ntama, ya mingi Mfumu Nzambi ya beto ke bokila.’ Mpamba ve kana ke na kisika yina Yandi katulaka yawu, na yawu yinki salamaka samu na bampova yina Pierre tubaka na

Kilumbu ya Pentecote?” Beno me mona? Ve, ya me sukaka ata fioti ve!

Mwana-dimeme ya luzolo yina fwaka, Menga
ya Nge ya zola
Ya ke zimbisa Ngolo ya yawu ata fioti ve,
Tii na kilumbu yina Dibuundu ya Nzambi yina
me sumbama
Ke vuluka, mpe ke sumuka diaka ve.

Na yawu na mukunga ya nene, ya kitoko,
Mu ke yimbila Mpulusu ya Nge,
Na ntangu yinwa yayi, ke kangama kimakulu
Na kati ya ntoni.

¹⁰⁰ Nzambi sadisa munu na kukwikila Yawu mpe kukangama na Yawu, mpe beto nionso, na kukangama na Yawu, samu Yawu ke Nsangu ya mbote ya Kieleka! Yinga, tata.

¹⁰¹ Muntu ya ndwenga ke tala na bima yayi ata fioti ve. Ya lendaka zaba ti yina ke sala ve. Yawu me salaka ata fioti ve. Nsambulu yina ba me bongisa mpe nzingilu yina ba me bongisa ke sala ata fioti ve na Ntwala ya Nzambi. Ya fwana kwisa kaka, kukondwa mvindu, na Nzambi. Nzambi me sadilaka yawu ata fioti ve, ata mbala mosi ve na ntangu me luta ti Nzambi me salaka na système ya mutindu yina. Ntangu yayi beno, oh, beno ke baka bandimi mpe bima ya mutindu yina. Kasi mu ke zonzila mbuma ya Nzambi ya kisina, Lusakumunu mutindu yina kulukaka na Kilumbu ya Pentecote, yina ke kwisa ata fioti ve na organisation mosi; ya ke kwisa na nzila ya lubutuku, kubutuka diaka mbala ya zole.

¹⁰² Ba me bokila beto na kubaka Israel mutindu—mutindu mbandu mosi, yina bawu vwandaka. Beno bambuka moyo, “Bawu zimbanaka Yandi, kiziba ya bawu yina pesamaka na bawu, mpe timunaka bawu mosi mabulu ya masa.” Beno lunga banza na kima ya mutindu yina, na ntangu muntu kele na dizanga ya masa ya kisina, ke nwa, mpe yandi zola timuna dibulu mosi ya masa, beno me mona, samu na kunwa kuna? Ntangu yayi yawu yina profete tubaka, yawu yina Ndinga ya Nzambi tubaka. Yawu yina Nzambi tubaka na profete. “Beno me zimbana Munu mpe—mpe me yambula Munu, Kiziba ya bamasa ya moyo; mpe me timuna beno mosi mabulu ya masa, yina ke ya kutobuka, mpe yina ke basisa masa.”

¹⁰³ Beno tala, kima mosi, bawu zolaka kima yina bawu lungaka yala, to kutalisa yina bawu salaka. Yina ke—yina ke bulawu ya bansambulu ya organisation. Ya kele kumeka ntangu nionso, bawu ke meka kusala kima mosi na mutindu ya bawu mosi. Bawu zola vwanda na ba systeme yayi nionso mpe bimvuka yayi, mpe nionso yina, “Mpe ntangu yayi mu ke mosi ya kimvuka *yayi*.” Na kisika kuvwanda bana ya Nzambi yina ke kukikulumus, bawu zola kima yina bawu lunga talisa bawu

mosi. Na kisika kubika Nzambi kusala yawu na mutindu ya Yandi mosi, bawu zolaka sala yawu na mutindu ya bawu. Yawu yina ba systeme me sala na dibuundu bubu yayi. Ve . . .Konso systeme, mosi zola yawu vwanda mutindu *yayi*, mosi yankaka zola yawu vwanda mutindu *yina*. Kana beno ke Methodiste, beno fwana vwanda mutindu *yayi*. Baptiste, mutindu *yayi*. Presbyterien, Catholique, bayankaka, ba ke na ba systeme ya bawu. Mu ke telemina yawu na kima mosi ve, kasi yawu yina ve mu zola tubila.

¹⁰⁴ Muntu zola sala mambu na mutindu ya yandi, mpe Nzambi ke na mutindu ya Yandi ya kusala yawu. Mpe Yandi tubaka, “Beno ke kangama na mutindu ya beno ya kusala, dibulu ya masa ya kutobuka; mpe beno ke manga na kundima nzila ya Munu, nzila ya Luzingu.”

¹⁰⁵ Mpe ya ke mutindu mosi bubu yayi. Ya me soba ata fioti ve. Beno banza kaka na kilawu ya muntu yina ke bika dizanga ya masa yina ya kisina yina ke basisa masa ya mbote mpe ya bunkete, mpe yandi zola kwenda na dibulu ya masa yina me salama na yandi mosi, mpe yandi mosi ke timuna dibulu ya masa, sika wapi ke kulumuka mvindu yina nionso ke na muludi ya kidikilu, mpe ke nwa yawu. Ya kieleka kima mosi ke tambula mbote ve na yintu ya muntu yina.

¹⁰⁶ Mpe na ntangu muntu mosi ke kangama na lubakusu ya Masonuku na mutindu ya dibuundu, na kisika ya kundima Mpeve-Santu yina ke ndimisa Masonuku mpe ke kumisa Yawu ya kieleka samu na beno, kele na kima mosi ke tambula mbote ve na muntu yina na mpeve. Yina ke kieleka. Yinga, Mpeve-Santu! Konso muntu ke na ntendulu ya Biblia ya bawu, yina ke kieleka na mutindu ya bawu. Nzambi ke na nsatu ya lusadusu ya beno ve. Nzambi ke na nsatu ya ntendulu ya beno ve.

¹⁰⁷ Nzambi ke Mutendudi ya Yandi Mosi. Nzambi ke salaka ntendulu ya yandi na mutindu Yandi—na mutindu Yandi tubaka ti Yandi ke sala yawu. Mfumu tubaka na mbatukulu, “Bika ti nsemo kuvwanda,” mpe nsemo vwandaka. Yina ke na nsatu ya ntendulu mosi ve. Yawu yina Nzambi salaka. Yandi tubaka “mwense mosi ke kuzwa kivumu,” yandi zwaka yawu. Yina ke na nsatu ya ntendulu mosi ve. Yandi tubaka ti Yandi ke “mwangisa Mpeve ya Yandi na bantu nionso,” Yandi salaka yawu. Ya ke na nsatu ya ntendulu mosi ve. Nzambi ke tendula Ndinga ya Yandi Mosi mpe ke ndimisa Yawu, mpe ke monisa Yawu, mpe ke sala kimbangi ya Yawu.

¹⁰⁸ Mutindu yina ya ndimisamaka ti profete vwandaka ya Nzambi. Yandi tubaka, “Kana muntu mosi na kati ya beno, yina ke ya kimpeve to profete, Munu Mfumu ke kukitalisa Munu mosi na yandi na nzila ya ba vision, mpe ke tuba na yandi na nzila ya bandosi. Mpe kana yina yandi ke tuba ke salama, beno banga yandi; kasi kana yawu salama ve, beno banga yandi ve.”

109 Ya ke mutindu mosi na ntangu Nzambi ke basisa Ndinga ya Yandi, mpe muntu ke tuba, “Ndinga ke mutindu *Yayi*,” mpe yawu salama mutindu yina, yina ke Nzambi ke sala yawu.

110 Kasi kana yandi ke tuba, “Ya ke mutindu *yayi*, mpe bilumbu me luta,” yina ke katula nionso. . . Yandi me simba dimpa ya bantu ya nzala, na diboko ya yandi, samu na bana, mpe me nata yawu ntama ya bawu; na ntangu ba ke na nzala. Samu na yinki beno lunga ndima na kunwa na dibulu ya masa na ntangu dizanga mosi ya masa ya kisina kele kuna?

111 Yinki kele kiziba ya Luzingu ntangu yayi? Yinki yayi kiziba ya Luzingu, kiziba ya Bamasa ya moyo? Ya ke kiziba ya masa ya kisina, tala na yina beto lunga fwanikisa Yawu.

112 Ntangu yayi mu zola ti beno bakula luswaswanu yina kele kati-kati ya dibulu ya masa mpe kiziba ya masa ya moyo; kiziba ya masa ya kisina, mpe dibulu ya masa ya nkulu ya kutobuka yina me fuluka na banzinzi, miseleketete, makototo, bamikolobo, mpe nionso yina, beno me mona.

113 Mpe awa ke na dizanga ya masa ya kisina. Beno tala mbote-mbote ntangu yayi. Ya me lunga na yawu mosi. Beno fwana baka ve ba systeme ya nene samu na kubaka mbongo mingi. Ya ke nsatu ve ya kukotisa bandimi mingi. Ya ke sadisa bandimi ya yandi, na Mpeve ya Luzingu yina ke na kati ya bawu, yina ke sala kosalu.

114 Beno tala masa yina ke basika kuna, ya madidi, ya kukondwa mvindu mpe ya bunkete. Dibulu ya masa ve, kima yina ke nginganaka ve yina ba me kotisa ba malongi makumi yiya, mabanza makumi yiya ya luswaswanu, yina me tuba, “*Yayi* ke mbote, mpe *yina* ke mbote, mpe dibanza *yayi*,” bawu ke soola mpe ke ndima yawu, mpe bawu ke salaka mutindu yina, mpe na nsuka bawu ke sala denomination mosi. Ya ke lomba Ndinga ya Nzambi, ya kukondwa mvindu mpe ya kitoko, yina me katuka na diboko ya Nzambi. Ya ke kiziba ya masa ya kisina ya kieleka.

115 Beno tala, kinsweki ya ngolo ya yawu kele na kati ya yawu mosi. Muntu lenda sengumuna yawu ve. Kima mosi ke tindika, na nsi ya yawu, yina ke tokisa yawu.

116 Mu ke bambuka moyo, na ntangu mu vwandaka, sinzidi na kizunga ya Indiana, sika wapi mu vwandaka luta, na Harrison County, pene-pene ya kiziba mosi ya masa, yinto mosi ya masa. Yawu vwandaka toka ntangu nionso. Mpe kaka, oh, ya monanaka ti ya vwandaka kaka na kiese. Ata ti ya vwandaka na mvula-mpembe na zulu ya ntoto, masa ya matadi, ata ti masa ya matadi kangaka yawu, ata ti madidi vwandaka, ya vwandaka toka kaka; ata ti biziba ya nkulu mpe batanki yina me salama na maboko ya bantu, ya kifuluka na makototo mpe bima nionso, vwandaka ya kukangama na madidi, tii na kati.

117 Yina ke talisa ti konso denomination, na mwa kukondwa ya Mpeve to mwa nsobolo ya atimosifere, ya ke kangama na madidi.

Kasi kiziba ya Nzambi ya masa ya kisina, Yandi kele—Yandi kele mutindu mosi mazono, bubu yayi, mpe kukonda nsuka, ya ke toka mpe ya ke na bunkete ntangu nionso. Mpe ya ke na mvindu ve kuna na kati, na kubanda. Mpe konso kima yina ke kota kuna, ya ke basisa yawu.

¹¹⁸ Ya vwandaka toka mutindu yina, mpe mu tubaka, kilumbu mosi mu vwandaka kuna, mu banzaka, “Mu banza ti mu ke solula na yinto yayi ya masa, na mwa ntangu fioti.” Mu katulaka yimpu ya munu, mpe mu tubaka, “Samu na yinki nge ke na kiese mingi? Yinki ke sala ti nge toka mutindu yayi? Mbala yankaka ya ke samu bankabi ke nwa masa ya nge, konso ntangu.”

Kana ya lendaka pesa mvutu, ya lendaka tuba, “Ve.”

Mu tubaka, “Mbala yankaka ya ke samu mu ke nwa masa ya nge.”

“Ve, ya ke mutindu yina ve.”

¹¹⁹ Mu tubaka, “Mbote, yinki ke sala ti nge vwanda na mvindu ve, mpe bunkete mingi? Na yawu yinki—yinki ke toka, yina ke tokisa nge, yina ke fulusa nge na kiese ntangu nionso, mpe kima mosi ve lenda kumisa nge madidi? Nge ke tiamuna masa na zulu, ke na kima mosi ve; kaka masa ya bunkete.”

¹²⁰ Kana ya lendaka tuba na munu, beno zaba yina ya zolaka tuba na munu? Ya lendaka tuba, “Mpangi Branham, ya ke munu ve yina ke toka, ya ke kima mosi na manima ya munu, yina ke tokisa munu.” Mpe ya ke mutindu mosi na . . . Beno tala mwa bandinga ya bumputu, kasi beno zaba yina mu zola tuba.

¹²¹ Mpe yina ke mutindu mosi na nzingilu yina me butuka mbala zole. Beno lunga kanga yawu ve. Ya ke na dizanga mosi ya masa na kati ya beno, yina ke toka tii na Luzingu ya kukonda nsuka. Beno me mona, ya ke na kima mosi kuna, mpe beno zaba diambu ya kusala ve. Batanki yina me salama na maboko ya bantu lenda kangama na madidi, mpe bantu ke lomba reveil mosi mpe nionso yina; kasi muntu yina ke na nsi ya Kiziba yina ya masa, ke zinga na kati ya Kiziba yina, ya ke na yawu mwini na mpimpa! Ve, beno lunga vingila ve bamasa ya mvula mpe ba reveil yayi. Beno me fuluka na Yawu. “Mu ke pesa yandi kiziba ya Luzingu, na kati ya yandi, yina ke toka ntangu nionso.” Kima mosi ke na kati ya Yawu, yina ke na madidi konso kilumbu, ya kukondwa mvindu mpe ya bunkete. Ya ke Ndinga ya Nzambi ya kukondwa mvindu na kati ya ntima ya beno mpe yinwa, ke kukindimisa Yawu mosi, ke zonzila Yawu mosi. Ata ti mvula kele, to mvulampebe, ya vwanda na konso ntangu yina, beno ke kaka na kiese samu Mpeve-Santu ke toka ntangu nionso kuna na kati. Ya ke Ngolo yina me bumbana na kati. Beno banza yawu. Oh, kinsweki ya yawu kele na kati ya yawu.

¹²² Ya ke kukipesa, ya ofele, na muntu nionso yina zola nwa mpe ke na nsatu ya nionso yina yawu kele. Ntangu yayi beno lunga pona-pona ve, mpe kutuba, “Mbote, ntangu yayi mu ke

kwenda na dibuundu ya ba Methodiste samu mu ke Methodiste, samu na kuzwa reveil mosi. Mu ke kwenda *kuna*, kasi (kana) mu fwana kwenda na ba Pentecotiste ya ke samu mu ke Pentecotiste revivaliste.” Mu ke tuba na beno, na ntangu beno ke na dizanga ya Masa yina ke toka ntangu nionso, Kiziba ya masa yina, na ntangu beno ke nwa kuna, ke vwanda na luswaswanu mosi ve, beno ke pesa yawu na muntu nionso ke luta kuna. Beno me kubama na kupesa kivuvu ya Luzingu na muntu ya Catholique, na Protestant, na Juif, na muntu yina ke kwikilaka ve ti Nzambi kele, to nionso yina yawu kele. Ya kieleka beno ke, ya kieleka beno ke na Kima mosi na kati ya beno, yina ke sala yawu.

¹²³ Beno tala kima yankaka samu na yawu, beno lunga pompa yawu ve. Beno lunga benda yawu ve, mpe kupompa yawu. Mu me monaka mingi samu na yawu ti ya ke pesa munu nsatu ya kuluka, kupompa kima mosi; na kubulaka mwa musiki, mpe kupamuka na zulu mpe na ntoto, to—to kufulusa mbanza na mikanda, na mazabusu ya nene, “Muntu ya ntangu ya beto.”

¹²⁴ Kele na Muntu ya ntangu mosi kaka, mpe ya kele Yesu Klisto, Yina kele mutindu mosi mazono, bubu yayi, mpe kukonda nsuka. Ya ke na Munati-nsangu ya Nzambi mosi kaka, mpe ya ke—ya ke Yesu Klisto. Yinga, tata.

¹²⁵ Beno lunga pompa Yawu ve, to kubenda samu na kukulumusa Yawu. To, ve, beno lunga kota na Yawu ve. Beno ke baka Yawu kaka, ya ofele. Amen. “Mu ke Kiziba ya Masa ya moyo; beno me yambula Munu, mpe me kwenda sala batanki ya beno mosi.” Ntangu yayi beno lunga pompa Yawu ve, kupompa Yawu, kupompa Yawu, mpe kukota na Yawu, kutimuna Yawu, kima yankaka ve. Beno fwana baka Yawu kaka, ya ofele.

¹²⁶ Beno ke na nsatu ve ya theologie ya bantu ve kitenda mosi ya lele na kisika ya kiyungulu, to, samu na kutuba na beno yina ke luta na Yawu, yina Ya me sala. Ve. Mwa theologie ya muntu ya mayele ya lukolo, nsambulu mosi ya bafarizi na *yayi*, na *yayi*, to mwa dibulu mosi ya masa ya ba systeme ya nsambulu; beno ke na nsatu ya yawu ve. Ya ke na nsatu ya kuvwanda kuna ve. Kana beno tula kiyungulu na zulu ya Yawu, Ya ke losa yawu ntama kuna. Ya ke na nsatu ya yawu ve. Ya me lunga na yawu mosi! Ya ke Ngolo ya Nzambi yina ke toka na Luzingu. Samu na yinki muntu ke kwenda ntama na kima ya mutindu Yina, samu na kukota na systeme mosi, ya ke yitukisa munu. Ya ke na nsatu ya bitenda ya lele ve. Ya ke na nsatu ya yawu ve. Ya ke na nsatu ve ya ku- . . . ya ke na nsatu ya masa ya mvula ve samu yawu fuluka. Ya ke ya kufuluka ntangu nionso. Amen.

¹²⁷ Muntu mosi, mutindu mu ke wa bawu ke tuba, “Mu ke na kiadi mingi bubu yayi.” Oh, la la!

¹²⁸ Oh, mu ke na kiese ya kuzinga na Ntwala ya Nzambi, ata ti mambu ke tambula mbote to ve. Ya ke Luzingu ya munu. Amen. Ya ke Luzingu ya beto. Yandi ke Luzingu, Luzingu ya kulunga.

Yinga, tata. Mpe—mpe beno tala yina Yandi ke sala samu na beto. Ngolo ya Yandi mpe bunkete kele na kati ya Yandi mosi. Ya ke na nsatu ya lusadusu ya dibulu ya masa ve to konso systeme yankaka.

¹²⁹ Muntu mosi tubaka, “Mbote, wapi kalati ya nge ya kimvuka? Beto tala kana nge ke Baptiste ya kieleka. Mu ke tala kana nge ke na kalati mosi.” To-to, “. . .Pentecotiste ya kieleka. . . kana nge ke Unitaire. . . Binitaire. . . Trinitaire.” To-to “. . .yina yankaka.” Beno me mona, Yandi ke na nsatu ya lusadusu mosi ve. Ya ke kwenda kaka na ntwala. Yinga.

¹³⁰ Beno zaba, mu vwandaka na dibulu ya nkulu ya masa, mu lendaka basisa masa kuna mpe vwandaka pompa mpe ke pompa mpe ke pompa, na pompi yayi ya nkulu, samu na kubasisa yawu kuna; beno zaba, kubasisa diaka masa, mpe kubasisa diaka banzini mpe nionso yina na kati kuna, samu na kubasisa diaka banzini mpe nionso yina na pompi yango. Ya ke kaka mutindu mosi na ba reveil yayi sistematiki.

¹³¹ Kasi, matondo na Nzambi, “Kele na Kiziba yina me fuluka na Menga, bansumuki ke bumbana na yinto yina!” Ba ke sala yawu bandimi ya dibuundu ve; ba ke sala yawu Baklisto na ntangu ba ke kwisa na Yinto yina.

¹³² Samu na yinki beno zola yambula Kiziba ya bamasa ya moyo, samu na kunwa masa na dibulu ya mvindu ya mutindu yina?

¹³³ Ba ke pompaka yawu ve; ngolo ya Yawu ke na kati ya Yawu mosi. Ya ke na nsatu ya lusadusu mosi ve, yinga, tata, samu (Yawu mosi) Luzingu ya Yawu Mosi ke na kati ya Yawu mosi. Tala mutindu mbuma ya Nzambi ke vwandaka na ntima ya muntu. Luzingu ya Nzambi ke na kati ya muntu, kasi na yinzo-Nzambi ve. Na kati ya beno, ya ke na kati ya beno, beno ke mosi yina ke na mbuma ya Luzingu na kati ya beno.

¹³⁴ Kumeka Yawu mbala mosi kaka ke ndimisa banganga-Nzambi nionso. Beno yufula nganga-Nzambi ya Catholique, beno yufula Baptiste, nionso yina. Kumeka kaka mbala mosi kiziba yayi ya nene ya masa ya kisina, mu ke tuba na beno, ya ke ndimisa ti Ya ke Kieleka. Na moyo ya beno ya nzala, na mutindu nionso, ya ke ndimisa muntu yina ke na mpwila ya masa, na mutindu nionso. Ntangu yayi kana beno ke na mpwila ya masa ve. . .Baptiste yina kuna, yandi vwandaka na mpwila ya masa ve, na kubanda; kasi na ntangu ya ke na mpwila ya masa, ya me kuzwa masa ya mbote mingi. Ya kieleka, kasi ya fwana vwanda ntete na mpwila ya masa, “mpwila ya masa ya lusakumunu,” mutindu Yesu bokilaka yawu. “Kiese na bayina ke na nzala mpe mpwila ya masa, samu ba ke fuluka na bima yina ba ke na yawu nsatu.” Amen. Yesu tubaka mutindu yina, nkundi ya munu. Yinga, tata, Ya ke Kiziba mosi ya lusakumunu samu na bayina ke na mpwila ya masa.

135 Samu na yinki muntu mosi lenda sobisa Yawu na dianga mosi ya masa? Samu na yinki beno zola sobisa kiziba ya masa ya kisina na dianga mosi ya masa, yina me fuluka na banzinzi mpe bamikolobo ya malongi ya bantu, samu na yawu Nzambi tubaka ti, “Kuyika kima mosi na Ndinga ya Yandi, to kukatula kima mosi na Bandinga ya Yandi, ba ke katula ndambu ya yandi na Buku ya Luzingu?”

136 Mpe na ntangu Nzambi silaka ti Yandi lunga ndimisa Ndinga yayi na bansungi nionso, “Samu nsilulu ke samu na beno mpe bana ya beno, mpe bayina kele ntama, ya mingi Mfumu Nzambi ya beto ke bokila,” samu na yinki beno zola pompa na nzila ya pompi mosi ya systeme yina ke na mikolobo kubanda bamvula mingi, na mwa mana yina ya nkulu? Mbala yankaka mana vwandaka mbote mingi, mu ke telemina yawu ve, na bilumbu ya Martin Luther, na bilumbu ya *yayi* mpe na bilumbu ya *yina*, mpe ba reformateur yankaka, mu ke telemina yawu ve; kasi ya ke mana yina bwaka kubanda ntama.

137 Kana beto bambuka moyo na kati ya Biblia, ya lombaka ti bawu lokuta yawu konso kilumbu. Ya lombaka ti bawu lokuta yina ya malu-malu. Kaka na ntangu yawu nunaka fioti, yawu polaka. Ya lungaka pola ve kukondwa kukota mikuni. Ya fwana vwanda na mikolobo, to kima yina ke—ke podisa yawu. Beto zaba ti ya ke mutindu yina.

138 Mpe ba systeme ke mutindu yina! Kaka ya me bikala kuna kubanda na reveil mosi na yina yankaka, mpe ya me kuma na mikolobo mpe ke vwanda ya kifuluka na banzinzi, mpe ya ke mutindu mosi na dibulu mosi ya masa yina me fuluka na mikuni, mutindu beto vwandaka bokila yawu, na banzinzi ya nkulu yina ke tambula kuna na kati.

139 Mpe yawu yina ke tambula mbote ve na nzingilu ya bantu mingi bubu yayi. Ba me—ba me fuluka na mikuni, ba ke kotisa mikuni na mosi na mosi, na mosi na yankaka, ba ke bula masolo yina ke ya Kieleka ve na nionso. Ya kieleka, ba ke kotisa mikuni na mosi na yankaka. “Mu vwandaka Methodiste; mu me kuma Baptiste. Mu vwandaka muntu ya Catholique; mu me kuma *yayi*. Mu me kuma *yina*.” Ya ke kaka mikuni.

140 Oh, beno zimbana nionso yina, mpe beno kwisa na Kiziba (Amen!), Kiziba ya masa ya kisina, kuvwanda na Ntwala ya Klisto yina ke zinga ntangu nionso! Mu ke kwikila ti Yandi ke Kiziba ya Luzingu yina ke yumaka ve. Kulutula mingi beno ke nwa na Yandi, ya ke kuma kitoko ya kulutula mingi, mpe madidi ya kulutula mingi, mpe ya mbote mingi, mpe ya ke na ntomo mingi. Bamvula makumi tatu na tatu me luta kubanda mu ke sadilaka Yandi, mpe ya ke kaka kitoko mingi konso kilumbu mutindu mosi na ntangu yina. Mu me vwandaka ata fioti ve. . . Ya tubaka ti beno ke vwanda diaka ve na mpwila ya masa kana

beto me nwa Masa yayi. Beno bambuka moyo yinki mutindu Ya ke ya nene. Oh!

¹⁴¹ Israel salaka mutindu bantu mingi ke sala bubu yayi, bawu yambulaka kiziba ya bamasa ya moyo, mpe kwendaka timuna bawu mosi mabulu ya masa.

¹⁴² Ntangu yayi beto tubila lemvo na mwa ntangu fioti, lemvo ya Nzambi. Beto ke na misiku mpe balutumumu, “Kana beno kele na yinda ya kitesilu yayi ve. . . Mu ke na kitesilu ya nsambulu mosi; kana beno kele na yinda ya kitesilu yayi ve, beno fwana, beno ke kota kuna ve,” mpe nionso yina. Kasi Nzambi ke vulusa beto na nzila ya lemvo, na nzila ya kitesilu mosi ve. Beno me mona? Kasi Nzambi, beto tubila lemvo ntangu yayi, yinki mutindu yawu salamaka, na ntangu ba vwandaka kunwa na Yandi, na kitesilu yayi. . .

¹⁴³ Kuniunguta, kuniunguta ya Israel. Beno tala, Yandi tubaka, “Mu ke kwisa tala beno diaka.” Beno tala mbote na Masonuku. Beno tala, Yandi ke meka bawu, samu na kutala bawu diaka. Israel yina vwandaka niunguta, kuna na Nzadi Mbwaki, ba bokilaka bawu na kulanda Yandi na masa yina ke ninganaka ve ya Egypte, samu na kuvwanda bantu ya kimpwanza. Bawu vwandaka bampika. Ba bokilaka bawu na kuzabuka samu na kuvwanda bantu ya kimpwanza, na Yandi. Kuluta na Nzadi ya Lufwa, Nzadi ya Lufwa; Nzadi Mbwaki, mu zola tuba, kuluta kuna, samu na kukwenda na ntoto ya kuyuma, samu na kusala luswaswanu kati-kati ya bawu na balandi-landi yina ke meka na kumekula yawu, kukondwa nzengolo ya bubakala.

¹⁴⁴ Oh, yawu yina nataka mpasi. Bawu nionso fwaka kuna na nto-. . . , to, kuna—kuna na nzadi, Pharaon na makesa ya yandi. Na ntangu bawu monaka bantu ke tambula na Ngolo ya mazulu, na yawu bawu kwisaka mpe mekaka na kumekula yawu, kukondwa ba kotisa bawu na lusakumunu yina. Mpe na ntangu bawu salaka mutindu yina, bawu fwaka. Ya ke kumekula ya nzutu.

¹⁴⁵ Muntu yina ke meka kusala mutindu yina, yina ke meka na kumekula kima mosi, yandi ke mekula na nzutu Muklisto ya kieleka.

¹⁴⁶ Mpangi ya munu yina mu-Indien me zaba yawu. Kana beno kwenda na Bombay, beno ke mona bantu kuna, ba Hindou mpe nionso yina, yina me lala na zulu ya bansonso mpe na zulu ya. . . yina ke tambula na zulu ya matenzi mpe—mpe yina ke tambula na zulu ya tiya, samu na kutalisa yina bawu lunga sala, mpe bima mutindu. . . Yina ke kaka kumekula ya nzutu ya muntu yina kuna na bamfinda ya nene, yina ke sala yawu mutindu munkayulu samu na nzambi ya yandi.

¹⁴⁷ Beto ke mona yawu bisika yina nionso ke na luzingu ya nsambulu mosi, kumekula ya nzutu, muntu mosi ke meka na kukifwanikisa na muntu yankaka. Kele na mbandu mosi kaka

beno lunga kukifwanikisa na yawu, kufwanana na Yesu Klisto, Yina vwandaka Ndinga. Mpe na ntangu Ndinga ya Nzambi ke kwisa na beno, ya ke vwanaka kaka mutindu mosi.

¹⁴⁸ Kasi Nzambi twadisaka bawu tii na ntoto ya nsilulu, na mutindu nionso. Bawu monaka, diaka, ti batanki nionso, na ntangu bawu bandaka nzietelo ya bawu kuna na ntoto ya kuyuma, na manima kukabwana, bawu monaka ti batanki nionso vwandaka ya kuyuma, samu na bawu.

¹⁴⁹ Mpe beno ke mona kima ya mutindu mosi, mpangi-bakala, na ntangu beno ke banda nzietelo yayi na kukwenda na Ntoto ya nsilulu. Beno ke mona bielo ke kangama. Mutindu longi yina ya leke tubaka, Anglican mosi, to nionso yina ya vwandaka, mpe, kima ya ntete beno zaba, dibuundu ya yandi basisaka yandi na nganda. Beno me mona, samu kaka yandi nataka bantu mingi na kuyamba Mpeve-Santu, yina vwandaka nsuka ya yandi.

¹⁵⁰ Mpe beto. . . mpe Israel monaka kima ya mutindu mosi, mutindu bambandu, na nzietelo ya bawu na ntoto ya nsilulu. Batanki nionso kuyumaka. Yinga, nzietelo ya bawu samu na kutumama na Ndinga ya Yandi ya nsilulu, nzietelo ya bawu, mpe batanki yina, bawu monaka ti yawu yumaka. Ntangu yayi bawu bakulaka ti bawu lendaka tula ntima ve na batanki—batanki, samu na nzietelo.

¹⁵¹ Mpe kana beno zola sala nzietelo samu na kutumama na Ndinga ya Nzambi, mpe beno ke meka na kukota na *yayi* mpe kukota na *yina*, beno ke mona ti ya ke na tanki mosi ve na yinza yina lunga kangila Yawu ntima. Ata mosi ve. Beno ke muntu. Nzambi ke twadisa beno kaka mutindu Yandi zola twadisa beno. Na yawu, beto ke mona kima ya mutindu mosi bubu yayi, mpe batanki nionso me yuma.

¹⁵² Kasi bansilulu, ke vwandaka ntangu nionso ya kieleka, na Nzambi Yina ke zitisaka nsilulu ya Yandi na bantu ya Yandi. Yandi silaka na kulungisa bansatu ya bawu, mpe Yandi salaka yawu. Na kati ya batanki yayi ya mpamba, ya kuyuma, beno banza na yawu kaka; mpe Israel yina vwandaka niunguta, na ntoto ya kuyuma, na nzietelo ya bawu! Yandi bokilaka na kingenga musadi-ntwadisi ya Yandi, profete Moise, kuna na simu mosi, mpe zibulaka kiziba mosi ya masa ya moyo, na Ditadi yina ba me bula, samu bana ya Yandi bakwikidi kufwa ve.

¹⁵³ Na bilumbu yayi, yina ke tendula lemvo, samu na munu. Beto me lunga ve. Yina beto salaka, mutindu beto zingaka, beto me lunga ve.

¹⁵⁴ Kasi Nzambi, na bilumbu yayi, kaka mutindu mosi na suka yayi, beno tala, samu na ba Methodiste, Baptiste, Presbyterien, muntu ya Catholique, mpe nionso yina, Yandi me zibula Kiziba mosi. Hebreux 13 ke ndimisa yawu, ti Yandi ke mutindu mosi mazono, bubu yayi, mpe kukonda nsuka. Mpamba ve ti yina—yina ke siamisa, Jean 3:16, “Samu Nzambi zolaka mingi yinza, ti

Yandi pesaka Mwana ya Yandi ya luzolo, ti yandi yina ke kwikila na Yandi ke fwa ve, kasi yandi kuzwa Luzingu ya kukonda nsuka.”

¹⁵⁵ Ba zangulaka yawu samu na bikuma mingi, samu bantu vwandaka niunguta mpe ke sumuka, mpe samu banioka tatikaka bawu mpe bawu vwandaka kufwa; mpe samu na lemvo ya masumu ya bawu, mpe kubeluka ya bimbevo ya bawu.

¹⁵⁶ Mpe Kiziba mosi yina me zibuka samu na beto bubu yayi, samu na mpulusu ya bawu mpe samu na kubeluka ya bawu, kubeluka ya nzutu. “Samu Yandi ke mutindu mosi mazono, bubu yayi, mpe kukonda nsuka.”

¹⁵⁷ Mpe na ntangu Ditadi yina ba bulaka na Ndinga ya Nzambi ya nsilulu, yina tumamaka, Yawu basisaka bayinto ya masa ya kukondwa mvindu mpe ya bunkete; yawu kele ve—ve masa yina ke ninganaka ve, ya ke masa ya mikolobo ve, kasi ya ke kuvwanda na Ntwala ya Nzambi Yandi mosi. Masa ya kukondwa mvindu, mpe yawu vulusaka bayina nionso nwaka yawu. Ntangu yayi beto zaba ti yina ke kieleka, samu beto ke tanga yawu na Ngwisani ya Ntama, mutindu kimonikisi.

¹⁵⁸ Ntangu yayi, beno lungaka benda yawu ve, kupompa yawu, kukota na yawu, kukota na seminere samu na kulonguka mutindu ya kusadila yawu. Kuna ba ke tuba na beno mutindu ya kusadila yawu, beno me mona, “Oh, mbote, beno, kana beno me yambaka Mpeve-Santu, beto ke kwikila yawu, kasi beno—beno sala yawu mutindu *yayi*.”

¹⁵⁹ Kasi, beno me mona, ba ke yalaka yawu ve. Beno yalaka Mpeve-Santu ve; Mpeve-Santu kuyala beno, beno me mona. Beno me mona, beno lenda ve, beno yala Mpeve-Santu ve; Mpeve-Santu kuyala beno. Dikabu ke kima yina beno ke baka ve, mumbandu mbele mosi, samu na kutula nsongi na crayon mosi. Ya ke kukipesa beno mosi na Nzambi, mpe kukatuka na nzila na mutindu ti Mpeve-Santu lunga sadila beno.

¹⁶⁰ Beno tala, bawu lendaka pompa yawu ata fioti ve to kubenda yawu, to bawu lendaka yufula ata fioti ve ti, “Ntangu yayi yinki mutindu beto ke sadila masa yayi?” Samu, bawu zaba mutindu ya kusadila yawu. Bawu vwandaka na mpwila ya masa. Bawu zabaka mutindu ya kusadila yawu.

¹⁶¹ Mpe ya ke mutindu mosi na bakala mosi to kento mosi, yina, ke tala ve na credo to na denomination yina yandi kele. Kana yandi ke na mpwila ya Nzambi, yandi ke na nsatu ve ya kubaka mbangu na seminere, mutindu salaka mpangi yayi Anglican, to mpangi ya Angleterre, mazono na nkokila, vutukaka samu kubaka ndongisila, na dibuundu ya ba Anglican, yinki mutindu yandi fwana sadila dikabu yayi ya nene ya vwandaka na yawu, kutuba bandinga ya malu-malu, mpe yinki mutindu ya fwana sala *yayi*. Ba ke basisa yandi na nganda, na kubanda. Beno me mona? Yandi vwandaka na mpwila ya masa, na yawu Nzambi

fulusaka yandi. Yawu yina kaka. Ntete kuvwanda na mpwila ya masa, mpe na manima Yandi ke fulusa.

¹⁶² Nge ke na nsatu ya kuyala kima mosi ve, ti muntu mosi kutuba na beno yina beno fwana sala na yawu. Nzambi ke twadisa konso muntu na mutindu Yandi zola ti beno sala. Nge ke muntu mosi, nge mosi kaka. Beno ke kitini ya Nzambi. Muntu mosi lunga baka kisika ya beno. Mpe ya ke na nsatu ya kukwenda na muntu mosi ve, mpe kutuba ntangu yayi, mu zola “sala *yayi* na yawu,” to mu zola “sala *yina* na yawu.” Ve, tata. Nzambi ke sadila yawu na mutindu yina—yina Yandi zola ti yawu vwanda. Na ntangu beno ke na mpwila ya masa, beno zaba ti beno fwana kunwa.

¹⁶³ Mpe kana beno ke na mpwila na suka yayi, Beno nwa Yawu, yawu yina kaka beno fwana sala. Nzambi vwandaka na mutindu ya kumanisa mpwila ya bawu, bana yina ke na mpwila ya masa lendaka kunwa ya ofele na Yandi. Mpe Nzambi me sala nzila mosi na suka yayi samu na bakala mpe kento mosi, yina ke na nzala mpe mpwila ya masa. Mbala yankaka ke na bantu awa, yina me vulukaka ata fioti ve. Kele na bantu awa yina zola vuluka.

¹⁶⁴ Kele na bantu awa, yina me vwanda awa mutindu bandimi ya dibuundu mosi, beno zola sala mambu ya mbote, kasi beno ke nwa na tanki mosi. Bawu lunga tuba na beno ata fioti ve ba Kieleka yayi.

¹⁶⁵ Kima mosi kaka ya kusala, kele kukwisa, samu na kubaka nsilulu ya Nzambi mpe kukwisa na Kiziba yina, na yawu Yandi ke manisa mpwila ya beno. “Yandi yina ke nwa na Kiziba yayi ke vwanda diaka ve na mpwila.”

¹⁶⁶ Beno tala ntangu yayi wapi mutindu—wapi mutindu Yandi vulusaka bantu ya Yandi—ya Yandi yina yambaka masa yayi, na lemvo, kasi na systeme mosi ve to dibulu mosi ya masa ya mayele ya lukolo. Yandi ke siamisa ti Ndinga ya Yandi, kele yinto ya Luzingu. Bantu yikwa na kati awa zaba ti beno me kuzwa Luzingu na ntangu beno me baka Ndinga yina mpe masa ya Yandi, beno zaba ya kieleka ti beno me kuzwa Luzingu? [Dibuundu me tuba, “Amen.”—Mu.]

¹⁶⁷ Na yawu, beto baka, kaka, mbandu yankaka, to zole, mpe mu ke manisa na mwa ntangu fioti. Mu—mu banza ti mu tulaka bouton yango kisika mosi kuna. Kasi beno tala. Mu ke na kutuba mingi, kasi ya ke dibanza ya munu ve. Beno tala, beto baka mbandu mosi, ya bantu yankaka.

¹⁶⁸ Beto baka kento yina na dibulu ya masa ya Jacob, dizanga ya masa yina ba me timuna. Yandi vwandaka kuna. Yawu yina kaka kento yina zabaka, ya vwandaka dibulu yayi ya masa sika wapi ya vwandaka kwisa baka masa. Mpe yandi monaka kuna me yekama na dizanga ya masa, na mwa zulu kuna, Muntu mosi me vwanda kuna, Juif mosi. Mpe yandi vwandaka Samaritain,

kuna beto ke na mbanza ya Sychar. Beto ke mona ti Muntu yayi, Juif yayi, tubaka Ndinga mosi ya luswaswanu na kento yayi, yandi tubaka, “Natila Munu masa.”

¹⁶⁹ Yandi tubaka ntangu yayi, “Beto ke na ngwisani ve. Ya ke—ya ke mbote ve samu na Nge na kuyufula munu kiuvu ya mutindu yina; Nge yina ke Juif, mpe munu yayi ke Samaritain.”

¹⁷⁰ Yandi tubaka, “Kasi kana nge zabaka na Nani nge ke tuba, nge lendaka lomba Munu masa ya kunwa, mpe Mu lungaka pesa masa yina ti nge ke vwanda diaka ve na nsatu ya kukwisa nwa na dibulu yayi ya masa; ya ke vwanda dizanga ya masa yina ke toka na nge.” Beno tala na ntangu yandi monaka ti yayi vwandaka Kieleka!

¹⁷¹ Ya ntete, ntangu yayi, muntu nionso lenda tuba mutindu yina. Kasi yandi tubaka, “Beno ke tubaka ti beno fwana sambila na Jerusalem, mpe beto ke sambilaka na mongo yayi.”

¹⁷² Yandi tubaka, “Mpulusu ke kwisa na ba Juif. Beto zaba yina beto ke kwilikala. Kasi,” tubaka, “bika Mu tuba na nge kima mosi,” na mutindu yankaka, “na mongo yayi ve, to na Jerusalem. Samu ntangu ke kwisa wapi bantu ke sambila Nzambi na Mpeve mpe Kieleka, samu Tata ke sosa bantu ya mutindu yayi.” Yandi tubaka, “Kwenda bokila bakala ya nge mpe kwisa awa.” Beno tala, kele sika yayi awa yawu siamisamaka. Kele awa yandi talisaka kiziba yina sika wapi yandi vwandaka. Yandi tubaka, “Kwenda bokila bakala ya nge mpe beno kwisa awa.”

Yandi tubaka, “Mu ke na bakala ve.”

¹⁷³ Yandi tubaka, “Nge me tuba kieleka.” Beno tala, ya monanaka ti ya vwandaka na luwawanu ve na yina Yandi vwandaka tuba na yandi, mpe yandi tubaka, “Kwenda bokila bakala ya nge.”

Yandi tubaka, “Mu ke na bakala ve.”

¹⁷⁴ Yandi tubaka, “Nge me tuba kieleka.” Yandi tubaka, “Samu nge vwandaka na bawu tanu, mpe yina nge ke zinga na yandi kele ya nge ve.”

¹⁷⁵ Beno tala kento yina, yinki mutindu ya vwandaka ya luswaswanu na banganga-Nzambi ya bilumbu yina! Banganga-Nzambi ya bilumbu yina monaka kima ya mutindu mosi kusalama, mpe tubaka, “Yina ke diabulu, mabanza, to—to Béelzebul.” Beno me mona, bawu monaka ve Ndinga yina silamaka kuna.

¹⁷⁶ Kasi kento yina ya leke yina vwandaka ya muvimba na Masonuku kulutila banganga-Nzambi nionso. Yandi tubaka, “Tata, mu ke mona ti Nge ke profete. Bamvula nkama mosi me luta beto vwandaka na mosi ve, kubanda na ntangu ya Malachie. Kasi,” yandi tubaka, “beto ke vingila mosi, mpe beto zaba ti kele na Mosi yina ke kwisa, Mesiya. Mpe na ntangu Yandi ke kwisa, Yandi ke sala mambu yayi.”

Yesu tubaka, “Mu kele Yandi.” Amen.

¹⁷⁷ Beno me bakula, yandi yambulaka dibungu ya yandi na dibulu ya masa ya Jacob, yandi bakaka ntinu na kati ya mbanza; ya kufuluka na dizanga ya masa ya kisina! Yandi monaka yawu ya kundimisama na mutindu ya kulunga, mpe Yandi vwandaka Kiziba yina ya Luzingu. Bika mu talisa yawu na beno. Yandi yambulaka yawu; na ntangu Yandi ndimisamaka ti ya vwandaka Ndinga ya Luzingu. Yandi yambulaka yawu; mpe monaka ti Ditadi yina mosi, yina ba bulaka na ntoto ya kuyuma, ndimisamaka ti ya vwandaka kuna.

¹⁷⁸ Bika mu tuba ti, Nzambi yina mosi vwandaka na bilumbu yina me luta, yina beto ke tubilaka mingi, Yandi kele awa na ntangu yayi; na nzila ya lubakusu ya theologie ve, kasi na nzila ya luzabu ya konso muntu ya kundimisama ya Yandi yina Yandi ke mwangisa na bilumbu yayi ya nsuka, Mpeve-Santu na zulu ya dibuundu ya Yandi. Yandi kele ve “Mu vwandaka.” Yandi ke kaka “MUNU KELE,” na ntangu yayi, ntangu nionso.

¹⁷⁹ Na yawu dibulu ya masa zimbisaka ntomo ya yawu. Mpe ya ke mutindu mosi na muntu yina nionso me kota na ngolo ya Nzambi, na nzila ya mbotika ya Mpeve-Santu, ba systeme ya ba denomination me zimbisa ntomo ya bawu. Beno zola diaka ve makototo yina ke ninganaka ve, mpe miseleketete, mpe banzinzi, mpe nionso yina. Beno ke nwa na Kiziba ya masa ya madidi mpe ya bunkete, Ndinga ya Nzambi, ya madidi ntangu nionso na kati ya moyo ya beno. Ya ke mutindu mosi na ntangu yayi, na ntangu Ndinga me ndimisama ti ya ke Kieleka, beno meka mpe beno tala kana ya ke mutindu yina ve.

¹⁸⁰ Dibulu ya masa sadisaka mbote-mbote, yawu sadisaka na ntangu ya yawu; kasi, beno tala, Kiziba ya Luzingu vwandaka kuna, dizanga ya masa ya Jacob diaka ve, samu na masa ya kimpeve. Bawu banzaka ti, kana bawu lendaka kunwa na dizanga ya masa yina, na yawu, ya lendaka vwanda mbote mingi; kasi na ntangu yayi Kiziba ya Luzingu Yawu mosi vwandaka kuna.

¹⁸¹ Ntangu yayi beto ke na nsatu ve ya ba systeme na ba organisation yina beto ke na yawu. Beto ke na ntangu ya nsuka. Mpe Nzambi silaka, na ntangu ya nsuka, Yandi ke sala mambu yayi. Mpe beto ke mona yawu ke lungisama, na kulanda Ndinga. Beto ke wa bamfumu ya makesa, ke telema, mpe ke tekita, mpe ke tuba ti, bawu, “Kima mosi zola salama.” Beto ke wa Mpeve-Santu ke zabisa beto ti kima mosi zola salama. Beto ke mona bima nionso ya kusungama. Na yawu, beno basika na systeme yina mpe beno kwisa na Kiziba. Yinga, tata.

¹⁸² Dibulu ya masa vwandaka na kikuma ya yawu, kasi ntangu yayi yandi vwandaka na ntuala ya Kiziba Yawu mosi.

¹⁸³ Na Jean 7:37-38, Yesu tubaka na bilumbu ya nsuka ya nkinzi ya tabernacle (yinki Yandi tubaka?), “Kana muntu mosi ke na

mpwila ya masa, yandi kwisa na Munu, mpe yandi kunwa.” Na kati ya kimvuka ya ba théologien! “Kana muntu mosi ke na mpwila ya masa, yandi kwisa na Munu, mpe yandi kunwa. Samu Masonuku tubaka ti, banzadi ya Masa ya moyo ke basika na ntima ya yandi.”

¹⁸⁴ Kele na Kiziba ya moyo. Ya ke Kiziba yina bantu me yambula bubu yayi. Samu na credo, bawu me yambula Kiziba ya Masa ya moyo. Bika mu talisa beno na Yandi. Samu na munu, Yandi. . . Mpe mu ke manisá.

¹⁸⁵ Samu na munu, Yandi, ke Kiziba yina vulusaka luzingu ya Hagar, na mwana, na ntangu bawu zolaka kufwa na ntoto ya kuyuma.

¹⁸⁶ Mu ke kwikila ti Yandi ke Ditadi yina, na Esaie 32, Yandi ke Ditadi yina na ntoto ya kuyuma. Yandi ke kisika ya lukengu na ntangu ya kitembo.

¹⁸⁷ Zacharie 13, Yandi ke Kiziba yina me zibuka ya Yinzo ya David, samu na masumu. Mu ke kwikila ti Ya ke mutindu yina. Beno ve? [Dibuundu me tuba, “Amen.”—Mu.]

¹⁸⁸ Na Psaume 36:9, Yandi ke kiziba ya Luzingu ya David. Yandi ke Bamasa ya pima ya David, mpe matiti ya mbote. Yandi ke Masa yina ke pene-pene ya mwa masa mosi, samu na David.

¹⁸⁹ Na Genese 17, Yandi ke dibeke yina ke pesaka madia na Abraham, El Shaddai. Kasi na ntangu ngolo ya yandi manaka, yandi lendaka kaka . . . Nzambi tubaka yawu.

¹⁹⁰ “Bakala mosi ya bamvula nkama mosi, wapi mutindu yayi lenda salama? Mu ke mununu, kento ya munu mpe ke mununu, yinki mutindu mambu yayi lunga salama?”

¹⁹¹ Yandi tubaka, “Mu kele El Shaddai.” Ntangu yayi, *El* kele “le,” [Na Kifalansa—Mub.] mpe—mpe *Shaddai* kele “dibeke,” mpe Shaddai ke na pluriel, yina zola tuba “Mu kele Nzambi yina ke na mabele.”

¹⁹² Mutindu bébé yina ke dila mpe ke bela, mpe ngolo ya yandi me mana, yina ke tula ntima na ntulu ya mama mpe ke nwa tii kuna yandi kuzwa ngolo ya yandi. Ya kieleka. Ya ke kaka ve. . . Na ntangu yandi ke nwa, yandi ke dila diaka ve. Na dibeke ya mama, yandi ke na kiese na ntangu yandi ke baka ngolo ya yandi.

¹⁹³ Mpe konso muntu yina ke baka nsilulu ya Nzambi na kati ya ntima ya yandi, ti, “Nsilulu ke samu na beno, mpe bana ya beno, mpe bayina nionso ke ntama, ya kulutila mingi Mfumum Nzambi ya beto ke bokila,” mpe beno yekama kaka kuna mpe beno baka ngolo ya beno. Mwana yina ke dila, kwikila yawu! Ya ke samu na bakwikidi.

¹⁹⁴ Muyimbi-mikunga ya mukwikidi, mu lendaka banza mikunga mingi yina miyimbu-mikunga salaka samu na beto. Kuvwandaka na mosi ya bawu yina tubaka kilumbu mosi, Yandi. . .

Kele na Kiziba mosi ya kufulukuka na Menga,
Yina basikaka na misisa ya Emmanuel,
Na ntangu bansumuki ke kota na yinto yina,
Ba ke zimbana kubwa ya bawu.

Kimpumbulu yina monaka na kiese nionso
Kiziba yina na kilumbu ya yandi;
Munu yayi muntu ya mpamba, mutindu yandi,
Mu me kwisa sukula masumu ya munu.

Mpe na lukwikilu mu ke mona yinto yina
Ke basika na bamputa ya nge,
Zola ya nge ya mpulusu kuvwanda mukunga
ya munu,
Tii na ntangu ya lufwa.

¹⁹⁵ Samu na munu, Yandi ke Bamasa ya Ndinga yina ya Nkabisa, yina ke kabisa beno na konso kima yina ke Ndinga ya Nzambi ve. Tala Kiziba yina mu ke kwikila ti Yandi kele. Yinga, tata. Yina, Ya ke Bamasa yina kabisaka munu na mabulu ya masa yina me salama na maboko ya bantu, tii na Kiziba ya Masa ya moyo. Oh, nkundi ya munu, mu lunga kaka . . . Beno lunga fula kaka, na kutubaka yina—yina nionso Yandi kele samu na beto! Yandi ke Alpha, Omega. Yandi ke Mbatukulu, Yandi ke Nsuka. Yandi ke Yandi yina vwandaka, yina kele, mpe ke kwisa. Yandi ke Nsimbulu mpe Dikanda ya David. Yandi ke Mbwetete ya Suka. Yandi ke Nionso samu na munu.

¹⁹⁶ Mpe, mpangi-bakala, mpangi-kento, kana beno me vwandaka ve. . . Kana beno ke nwa na tanki yina me salama na maboko ya bantu, na luzingu ya beno ya muvimba, samu na yinki na suka yayi beno lunga yambula ve tanki yina mpe beno kwisa na Kiziba yayi?

¹⁹⁷ Beto kulumusa bayintu ya beto na mwa ntangu fioti. Mutindu beto me kulumusa bayintu ya beto. . . [Mpangi-kento mosi me banda na kuyimbila na ndinga ya malu-malu. Kitini ya mpamba na bande. Muntu mosi ke pesa ntendulu ya yawu—Mu]. . . na mutindu ya munu, lubokilu ya autel. Yikwa ntangu yayi?

¹⁹⁸ Mu—mu vwandaka ya muvimba na kidi-kidi, samu mu—mu me baka beno ntangu ya yinda, yawu yina me sala ti mu longa nsangu mosi ya bitini-bitini. Kasi mu ke kwikila ti Mpeve-Santu zola ti beno bakula yina mu ke tuba. Beno tala, ke na kima ya mfunu mingi ve na bilumbu yayi kulutula kuvwanda ya kusungama na Nzambi; beno me mona, bamadia ya beto ya suka, nionso yina yawu kele, nionso yina. Mfumu kele awa. Ntangu yayi, mbala yankaka mu me waka yawu kaka mbala mosi na luzingu ya munu, tii na ntangu yayi.

¹⁹⁹ Ntangu yayi yinki mutindu. . . beno nionso awa, “yikwa” ve. Beno nionso awa yina zola kunwa na Yawu, beno telema na

mwa ntangu fioti, samu na kusambila. Nzambi sakumuna beno. Mfumu kusakumuna beno.

²⁰⁰ Ntangu yayi yikwa awa, yina—yina me telema na ntangu yayi, lenda tuba, na ntangu me telemisa diboko mutindu *yayi*, “Nzambi, sala kima mosi na munu, mpe fulusa munu, bika mu nwa na Kiziba yayi. Mpe mu salaka ve kima ya mbote, kasi mu—mu zola ti Nge lemvokila munu samu na yawu. Mu zola ti Nge katula masumu ya munu nionso. Mpe sala ti—sala ti—sala ti munu, kubanda bubu yayi, kaka . . .”? Beno tala! Oh, la la!

Kele na Kizina yina me fuluka na Menga,
Yina basikaka na misisa ya Emmanuel,
Mpe kana basumuki kukota na yinto yina,
Ba ke zimbana kubwa ya bawu.
Ba ke zimbana kubwa ya bawu,
Ba ke zimbana kubwa ya bawu;
Mpe kana bansumuki kukota na yinto yina,
Ba ke zimbana kubwa ya bawu.

²⁰¹ Na yawu ntangu yayi, beno yina ke mukwikidi Muklisto, yina me ndimaka Klisto mutindu Mvulusi ya beno mosi, kasi kana beno me salaka yawu ntete ve . . . Ntangu yayi kana beno me salaka yawu ntete ve, beno tala Kiziba. Mosi kaka mu zaba kele Kiziba yina me basika na misisa ya Emmanuel. Ntangu yayi, mpe kana mingi ya beno awa . . .

²⁰² Ya ke kaka mutindu mu vwandaka tuba na nkokila yina me luta samu na mwa mpongo yina vwandaka tambula na lupangu ya bansunsu. Mpe yandi zabaka ata fioti ve kima yankaka kasi bansunsu, kasi yandi zabaka ti ya vwandaka na kima mosi samu na yandi yina vwandaka ya luswaswanu na bansunsu. Mpe mama ya yandi kwisaka sosa yandi, mpe yandi bokaka kuna na zulu. Ya vwandaka kuyimba ya mpongo. Beno me mona, ya lombaka ti yawu vwanda mpongo mosi, na kubanda, kana ve ya lendaka zaba lubokilu yina ve. Beno me mona, yandi . . .

²⁰³ Ya lendaka vwanda na kima mosi kuna, yina lendaka baka kivumu, kana ve ya lunga pesa Luzingu ata fioti ve. Mpe kana Mbuma, Ndinga ya Nzambi, ke na kati ya beno, Mpeve-Santu kele awa na ntangu yayi samu na kupesa yawu kivumu mpe kukumisa Yawu kieleka samu na beno.

²⁰⁴ Yikwa na kati awa me bakaka ntete ve mbotika ya Mpeve-Santu, beno lunga telemisa maboko ya beno? Bisika nionso, bisika nionso beno kele, beno vwanda ya kusungama, kana beno me yambaka Mpeve-Santu, mpe beno lunga, telemisa maboko ya beno. Bisika nionso beno kele, beno bika yawu kaka na zulu, na mwa ntangu fioti.

²⁰⁵ Ntangu yayi mu zola ti, beno yina me telema pene-pene mpe ke tala bawu, mu zola ti beno tetika maboko na zulu ya bawu.

²⁰⁶ Ntangu yayi mu ke kwikila ti Mpeve-Santu ke fulusa beno nionso yina zola Yawu. Ntangu yayi beno banza ve na madia yina

kuna na cafeteria. Beto banza na Madia yayi awa. Yawu yayi Mosi. Ya ke Luzingu. Beno me mona, yayi ke Luzingu.

²⁰⁷ Ntangu yayi beno baluka, na ntwala ya mosi na yankaka, mpe beno tetika maboko na zulu ya mosi na yankaka. “Mpe bawu tetikaka maboko na zulu ya bawu!” Ntangu yayi mu zola ti beno sambila samu na muntu yina beno me tetika maboko ya beno. . .

²⁰⁸ Ntangu yayi beno banza ve na kubasika. Beno banza kima yankaka ve. Beno banza, kaka na ntangu yayi, ti Mpeve-Santu kele awa samu na kufulusa konso muntu. Beno zibula bantima ya beno, beno basisa masa nionso na dibulu ya masa ya beno, mpe beno tuba, “O Kiziba ya Luzingu, kota na munu. Fulusa munu, O Mfumu Nzambi, na mambote mpe mawa ya Nge.”

²⁰⁹ Mfumu Yesu, Kiziba yina ke yumaka ve! Mu ke sambila, Nzambi, ti Nge ke fulusa mosi na mosi ya bawu. Bika ti Mpeve-Santu kukulumuka awa. Mu ke sambila, Nzambi, ti beto ke zimbana bima nionso yankaka; ti Mpeve-Santu kukulumuka na kati ya beto, na ntangu yayi, mpe Nge ke pesa Bamasa yina ya Luzingu, ya ofele, bisika nionso. Pesa yawu, O Nzambi. Na ntangu yayi kisambu na mikunga ke landana, ke vukana, Mfumu, na kuzabaka ti beto ke na Ntwala ya Nge, kuvwanda na Ntwala ya Nge ya Bunzambi, beto zola kwisa na Kiziba. Beto ke na nsatu ya mbotika ya kieleka, ya kisina ya Mpeve-Santu. Mfumu, bantu yayi ke sambila samu na Yawu. Mu ke sambila ti, kaka na ntangu yayi, ti ba ke fuluka na mambote ya Nzambi. Pesa yawu, O Nzambi. Wa kisambu ya bana ya Nge. Bika ti Nge kwisa na zulu ya banzutu ya bawu, bika ti Ngolo ya Nzambi, na Mpeve-Santu, kuyala bawu. Pesa yawu, Nzambi.

²¹⁰ O beto ke tonda Nge samu na ntangu yayi ya mbote, kuvwanda na Ntwala ya Nzambi ya Zulu ya ngolo, yina me telema na kati ya beto! Na ngunga yayi ya midi, Mfumu, disa beto! Mfumu, beto ke na nsatu ya Madia ya mesa ya Nge. Disa beto, Mfumu, na ntangu yayi. Disa beto na Mpeve-Santu, na baluzingu ya beto. Mioyo ya beto ya nzala mpe ya kuyuma kele na mpwila. Mutindu Nge tubaka na ntendulu ya mukunga, “Ti ba ke mwangisa masa na ntoto ya kuyuma.” Bika ti yawu salama, Mfumu. Bika ti Bandinga ya Nge kumonisama na kati ya bantima ya bana ya Nge, “Bamasa na zulu ya ntoto ya kuyuma, ya kukondwa masa.” Nzambi ya Kukonda nsuka, wa kisambu ya musadi ya Nge, mpe pesa beto Lusakumunu yina. Amen.

Oh, mu zola Ye- . . .

²¹¹ Beno fula kaka na kukumisa Yandi ntangu yayi. Beno zaba ti, Mpeve-Santu kele awa. Kana beno yamba Yandi ve, yina me tala beno.

Mu zola Yesu,

“Nge zola Munu mingi kulutila bayayi?”

. . . zola Yesu,
Samu Yandi zolaka munu ya ntete.

Oh, mu zola . . . (Nzambi kubaka lukumu!)
Oh, mu zola . . . (Yinki ke vwanda kana Yandi
kwisa na ntangu yayi?)
Oh, mu zola Yesu,
Samu Yandi zolaka munu ya ntete.

Mu ke yambula Yandi ve,
Mu ke yambula Yandi ve,
Mu ke yambula Yandi ve,
Samu Yandi zolaka munu ya ntete.

Yesu kele mbote, mbote, mbote samu na munu,
Konseye, Ntinu ya Ngemba, Yandi ke Nzambi
ya Ngolo;
Oh, ya me vulusa munu, ke keba munu na
masumu mpe nsoni nionso,
Musumbi ya munu kele mbote, mu ke kumisa
Yandi . . .

212 Beto yimbila Yandi ntangu yayi!

Yesu kele mbote, mbote, samu na munu,
Konseye, Ntinu ya Ngemba, Yandi ke Nzambi
ya Ngolo;
Oh, ya me vulusa munu, ke keba munu na
masumu mpe nsoni nionso,
Musumbi ya munu kele mbote, mu ke kumisa
Nkumbu ya Yandi!

213 Bayina nionso ke wa mutindu yina, beno tuba “amen.”
[Dibuundu me tuba, “Amen.”—Mu.] Oh, alleluia! Mu me mona
bantu me yamba Mpeve-Santu, ntangu yayi.

Mu zimbanaka, ntangu yayi mu me vuluka,
kitumbu mosi diaka ve,
Yesu ke pesa kimpwanza mpe mpulusu ya
kieleka;
Ya me vulusa munu, ke keba munu na masumu
mpe nsoni nionso,
Musumbi ya munu kele mbote, mu ke
kumisa . . .

Beto telemisa maboko ya beto ntangu yayi mpe beto ku- . . .

Oh, Yesu kele mbote, mbote, samu na munu,
Konseye, Ntinu ya Ngemba, Yandi ke Nzambi
ya Ngolo;
Oh, ya me vulusa munu, ke keba munu na
masumu mpe nsoni nionso,
Musumbi ya munu kele mbote, mu ke kumisa
Nkumbu ya Yandi.

214 Beno zola Yandi? [Dibuundu me tuba, “Amen!”—Mu.] Oh, ya ke mbote! Lukumu na Kiziba yina me fuluka na Menga, sika wapi bansumuki ke zimbisa boma nionso ya bantu, bitumbu nionso, na kimpwanza kaka na Yandi. Alleluia! Oh, la la, ya ke mbote ya kieleka!

215 Ntangu yayi beto yimbila diaka, bika ti ba Methodiste nionso, ba Baptiste, ba Catholique, ba Presbyterien, nionso yina, na ntangu beto ke yimbila yayi, “Yesu kele, mbote samu na munu,” beto baluka mpe beto pesana mbote bamosi na bayankaka, samu na kuvwanda kaka na ngwisani ya mbote na kati ya beto. Beno zaba, munu, yawu yina mu ke zolaka. Beto banda, beto yimbila yawu ntangu yayi mutindu beto ke sala yawu.

Oh, Yesu kele mbote, mbote, samu na munu,


216 [Mpangi Demos Shakarian ke tuba na Mpangi Branham ti, “Mpangi Branham, ba me zabisa munu ti Ntwadisi ya yinsi Johnson, ba me nata yandi na nswalu nionso na lupitalu samu yandi me kangama ntima, mpe mbala yankaka ya ke vwanda mbote ti beto sambila samu na yandi mpe samu na yinsi ya beto.” Bampangi ke solula yawu. Muntu mosi me tuba, “Beto vingila fioti.”—Mu.]

Yesu kele mbote, mbote, (ya kieleka)

Oh, Konseye, Ntinu ya Ngemba,

217 [Mpangi Shakarian ke tuba diaka na Mpangi Branham, “Na lemvo ya nge, na lemvo ya nge diaka, beno lunga kulumuka fioti?” Mpangi Earl Prickett ke twadisa dibuundu na kuyimbila mukunga, *Yandi kele mbote*. Kitini ya mpamba na bande. Dibuundu ke yimbila *Kele Na Nzadi Ya Luzingu*. Kitini yankaka ya mpamba na bande—Mu.]

Biblia ke tuba, “Beno sambila samu na bayina ke na luyalu.”

218 Tata ya beto ya Mazulu, beto ke na nsatu ya nene samu na ntwadisi ya yinsi ya beto, Ntwadisi ya yinsi ya beto. Mbala yankaka ya lunga zaba yayi ve, Mfumu, kasi Nge zaba yawu. Mu ke sambila samu na Mpangi Johnson, mutindu yandi ke tubaka ti yandi ke kwikilaka na Nge. Mpe, Tata, ya ke na mpasi ya nene ya ntima, beto me bakula ti, ntima ya yandi me kangama. Mu ke sambila, Nzambi, keba luzingu ya yandi. Beto ke na ntangu ya mpasi ya nene na yinsi ya beto na ntangu yayi, na mutindu nionso. Mpe bika ti Mpeve ya Nge kukwisa na zulu ya yandi, Mfumu. Mpe na ntangu yayi, na lupitalu to bisika nionso yandi kele, mpe bika ti Mpeve ya Nge kukulumuka na Lupitalu Walter Reed mpe kusimba nzutu ya yandi, samu na kukeba luzingu ya yandi. Mfumu, muntu yayi ke na mpasi ya mingi, ya mingi kulutila yina beto ke bakula. Na yawu beto ke sambila, Nzambi, mutindu bakwikidi mpe mosi ya yinsi yayi, beto ke sambila samu na ntwadisi ya beto, ti Nge pesa yandi luzingu ya yinda, na ngunga yayi ya nene, na Nkumbu ya Yesu Klisto. Amen. 

MABULU YA MASA YA KUTOBUKA KNG65-0123
(Broken Cisterns)

Nsangu yayi ya Mpangi William Marrion Branham, kulongamaka na Kingelesi, na suka ya Kilumbu ya sambanu, na kilumbu ya 23 ya Ngonda ya ntete, na mvula 1965, na Lukutakanu ya Bantu ya Mumbongo ya Nsangu ya mbote Muvimba ya Yinza muvimba na madia ya suka na Ramada Inn na Phoenix, Arizona, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org